

MESYUARAT KETIGA, PENGGAL KEDUA
PARLIMEN KEEMPAT BELAS
2019

HARI ISNIN : 4 NOVEMBER 2019

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : YB DATO' SRI MUSTAPA BIN MOHAMED [JELI]

TARIKH : 04 NOVEMBER 2019

SOALAN

Minta **MENTERI SUMBER MANUSIA** menyatakan jumlah pembuangan pekerja dalam semua sektor sepanjang 2018, dan setakat ini 2019. Berapakah bilangan yang ditawarkan VSS dalam tempoh yang sama dan berapakah bilangan peluang pekerjaan yang telah diwujudkan sepanjang tahun 2019 mengikut sektor.

JAWAPAN

Tuan Yang di-Pertua,

1. Berdasarkan notifikasi oleh majikan, bilangan pekerja yang diberhentikan bagi sektor swasta tahun 2018 adalah seramai 23,168 orang pekerja yang melibatkan 17,236 (74.4%) pemberhentian biasa dan 5,932 (25.6%) pemberhentian sukarela (VSS). Manakala sehingga 30 September 2019 seramai 24,600 orang pekerja yang terlibat. Daripada jumlah tersebut, seramai 21,625 (87.9%) orang pekerja terlibat dengan pemberhentian biasa. Manakala, seramai 2,975 (12.1%) orang pekerja pula terlibat dengan pemberhentian sukarela (VSS).
2. Bagi tahun semasa, pekerja yang terjejas merupakan di sektor sektor pembuatan mencatat bilangan seramai 7,944 orang (32.29%)

SOALAN NO : 1

terlibat, seramai 7,309 orang (29.71%) di sektor aktiviti pentadbiran dan khidmat sokongan, seramai 2,123 orang (8.63%) di sektor perdagangan, borong dan runcit, seramai 1,748 orang (7.11%) di sektor aktiviti kewangan dan insurans, seramai 1,049 orang (4.26%) di sektor penginapan dan aktiviti perkhidmatan makanan dan minuman. Manakala seramai 6,79 orang (2.76%) di sektor maklumat dan komunikasi.

3. Berdasarkan statistik daripada Portal pekerjaan sehingga Ogos 2019, kekosongan pekerjaan yang didaftarkan oleh majikan-majikan bagi kategori siswazah adalah sebanyak 50,326 jawatan manakala sebanyak 642,979 kekosongan jawatan adalah untuk kategori bukan siswazah. Pengiklanan oleh lebih 20,000 majikan aktif yang menawarkan pelbagai jawatan di semua kategori pekerjaan sektor awam dan swasta. Portal *JobsMalaysia* (JMC) di bawah kementerian ini merupakan portal rasmi pasaran pekerja untuk pencarian dan penawaran pekerjaan melalui sistem padanan kerja secara *web based*. Setiap pencari kerja berpeluang mendapatkan pekerjaan dan majikan pula berpeluang untuk mendapatkan calon yang sesuai. Pusat *JobsMalaysia* (JMC) di seluruh negara menawarkan pelbagai informasi kekosongan pekerjaan dan perkhidmatan khidmat nasihat pekerjaan kepada pencari kerja. Majikan dan pencari kerja juga berpeluang untuk menyertai karnival pekerjaan di seluruh negara termasuk program-program temuduga terbuka yang diadakan di semua *Urban Transformation Center* (UTC) di seluruh negara sepanjang tahun.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

SOALAN : LISAN

**DARIPADA : TUAN CHE ALIAS BIN HAMID,
(KEMAMAN)**

TARIKH : 4 NOVEMBER 2019 (ISNIN)

SOALAN NO.2

Minta **MENTERI AIR, TANAH DAN SUMBER ASLI** menyatakan hasrat Kementerian untuk melaksanakan tempoh percubaan untuk menguji keberkesanan prosedur operasi standard (SOP) baru perlombongan dan pengeksporan bauksit.

JAWAPAN

Tuan yang di- Pertua,

1. Prosedur Operasi Standard (SOP) Perlombongan dan Pengeksportan Bauksit Negeri Pahang yang disediakan ini telah merangkumi seluruh rangkaian aktiviti perlombongan dan pengeksportan bauksit (pra perlombongan, semasa perlombongan dan pasca perlombongan).
2. SOP ini telah mengambil kira pandangan-pandangan dari semua *stakeholder* yang terlibat termasuklah masyarakat tempatan, penggiat industri, badan-badan bukan kerajaan (NGO), persatuan penduduk dan SOP ini dinilai secara bebas oleh Jawatankuasa Eksekutif Penilaian SOP Perlombongan dan Pengeksportan Bauksit Negeri Pahang.
3. SOP tersebut telah mengenakan syarat-syarat yang ketat bermula dari proses permohonan, pengangkutan, stockpile berpusat dan pengeksportan. Antara syarat yang perlu dipatuhi oleh penggiat industri adalah kelulusan laporan *Environmental Impact Assessment* (EIA), saiz minimum tapak lombong, pemprosesan bijih bauksit dan lain-lain.
4. Pada peringkat awal, Kementerian berhasrat untuk meneliti keupayaan penggiat-penggiat industri untuk mematuhi semua syarat-syarat dalam SOP tersebut dan juga keupayaan agensi-agensi penguatkuasaan untuk menyelia operasi perlombongan dan pengeksportan bauksit.

NO. SOALAN : 2

5. Kementerian juga ingin memastikan supaya aktiviti perlombongan bauksit dan mineral-mineral lain dapat dilaksanakan secara mampan dan mempunyai nilai tambah bagi meningkatkan aktiviti ekonomi negara.
6. Bagi menguji keberkesanan SOP yang baharu ini, pihak Kerajaan Negeri Pahang telah bersetuju supaya hanya beberapa operator sahaja dibenarkan di kawasan Gebeng, Kuantan setelah mendapatkan kelulusan-kelulusan seperti yang telah ditetapkan. Kementerian ini dimaklumkan bahawa pihak Kerajaan Negeri Pahang mencadangkan tempoh selama 6 bulan diperlukan bagi menguji keberkesanan SOP yang baharu ini sebelum aktiviti perlombongan bauksit boleh dibuka untuk seluruh Negeri Pahang dan di negara ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATIN PADUKA DR. TAN YEE KEW
[WANGSA MAJU]**

TARIKH : 4 NOVEMBER 2019 (ISNIN)

SOALAN

DATIN PADUKA DR. TAN YEE KEW [WANGSA MAJU] minta **MENTERI WILAYAH PERSEKUTUAN** menyatakan kaedah bagi memastikan setiap aktiviti atau projek yang menggunakan bajet Dewan Bandaraya Kuala Lumpur (DBKL) saban tahun adalah lebih akauntabiliti dan telus bagi mengelakkan sebarang salah guna kuasa, penyelewengan dan rasuah berlaku.

JAWAPAN

Tuan Yang Di Pertua

Untuk makluman Yang Berhormat Wangsa Maju, matlamat pelaksanaan tadbir urus yang baik adalah untuk memastikan kerajaan dapat mengendalikan hal ehwal pentadbiran dan penyampaian perkhidmatan secara cekap, berkesan, bebas rasuah serta responsif terhadap kehendak rakyat berlandaskan prinsip ketelusan intergriti dan kebertanggungjawapan. Pelan AntiRasuah Nasional 2019-2023 yang dilancarkan oleh Perdana Menteri pada 29 Januari 2019 telah mengariskan pemisahan bidang kuasa menteri dengan ketua setiausaha (ketua agensi kerajaan). Ini dilakukan sebagai usaha untuk memisahkan pentadbiran

SOALAN NO : 3

kerajaan daripada pengaruh politik. Ini perlu untuk memastikan pihak perundangan, pendakwaan dan agensi penguatkuasaan dapat melaksanakan fungsi dengan bebas dan adil berlandaskan undang-undang yang berkuatkuasa. Pelan khusus ini telah dibangunkan oleh Pusat Governans, Integriti dan Anti Rasuah, Jabatan Perdana Menteri (GIACC) dengan kerjasama agensi-agensi kerajaan lain.

Disamping itu, ketelusan dan pertanggungjawaban dicapai oleh DBKL melalui 3 tahap pemantauan. Tahap pertama adalah pematuhan DBKL kepada panduan-panduan dan dasar pengurusan dalaman DBKL itu sendiri. Sebagai contoh:-

- 1) Tatacara pelaksanaan perolehan hendaklah melalui punca kuasa yang jelas seperti terkandung dalam **Perintah Tetap Perolehan Datuk Bandar Tahun 2015**;
- 2) Menyedia dan menggunapakai Garis Panduan Pengurusan Projek Pembangunan Fizikal;
- 3) Memantau prestasi perbelanjaan melalui Mesyuarat Jawatankuasa Pengurusan Kewangan Dan Akaun (JPKA);
- 4) Pelaporan hasil dan perbelanjaan dalam Penyata Kewangan Tahunan DBKL diaudit oleh Ketua Audit Negara setiap tahun;
- 5) Mewujudkan beberapa jawatankuasa baru supaya pembuatan keputusan dibuat secara kolektif atau melalui sesebuah jawatankuasa;
- 6) Persoalan pemisahan tugas dititikberatkan di mana sesuatu proses kerja melibatkan jabatan yang berbeza bagi tujuan semak dan imbang;dan

SOALAN NO : 3

- 7) Penggiliran tugas juga dilaksanakan dengan menempatkan semula pegawai/kakitangan ke bahagian/jabatan baru dari masa ke semasa.

Tahap yang kedua adalah melalui pendekatan separa luaran juga telah diperkenalkan di DBKL melalui:-

- 1) Mesyuarat Majlis Menteri yang melibatkan kesemua Ahli Parlimen Wilayah Persekutuan Kuala Lumpur untuk turut sama membincang dan mengesyorkan dasar serta hala tuju kepada DBKL;dan
- 2) Pembentukan MPP yang lebih bersifat akar umbi yang dapat menilai pemilihan dan pelaksanaan projek adalah wajar dan tidak membazir.

Pendekatan yang ke 3 dan yang terakhir, iaitu pendekatan luaran bersama rakyat jelata juga dibuat melalui:-

- 1) Aduan terus kepada DBKL melalui portal e-Complaint (iSPAAA);
- 2) Aduan terus kepada Kementerian Wilayah Persekutuan melalui portal Facebook dan Tweeter KWP dan juga YB Menteri;dan
- 3) Aduan terus kepada YB Ahli Parlimen Wilayah Persekutuan Kuala Lumpur.

Pemantauan terhadap ketelusan dan kebertanggungjawaban adalah tanggungjawab kita bersama.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN HAJI AWANG BIN HASHIM
[PENDANG]**

TARIKH : 4 NOVEMBER 2019 (ISNIN)

SOALAN

Minta **MENTERI HAL EHWAL EKONOMI** menyatakan sejauh manakah dasar Wawasan Kemakmuran Bersama 2021-2030 yang dilancarkan oleh Kerajaan mampu menyelesaikan masalah ekonomi negara dan kehidupan rakyat yang semakin susah sekarang.

JAWAPAN

Tuan Yang di-Pertua,

1. Wawasan Kemakmuran Bersama 2030 (WKB) merupakan hala tuju baharu pembangunan negara bagi tempoh 10 tahun mulai tahun 2021 hingga 2030.
2. Untuk makluman Ahli Yang Berhormat, secara keseluruhannya, walaupun pertumbuhan ekonomi negara menunjukkan prestasi yang menggalakkan, namun ianya masih belum digembleng sepenuhnya bagi mencapai potensi yang optimum. Selain itu, terdapat pelbagai isu struktur yang perlu ditangani, antaranya sumber pertumbuhan yang masih bergantung kepada faktor pengeluaran tradisional seperti modal serta buruh dan bukannya peningkatan produktiviti.
3. Isu produktiviti berkait rapat dengan tahap kemahiran pekerja. Pada masa ini, industri masih didominasi oleh pekerjaan separuh mahir dan berkemahiran rendah yang merangkumi sebanyak 72.8 peratus daripada keseluruhan tenaga kerja.

NO. SOALAN : 4

4. Sebahagian besar industri di Malaysia masih bergantung kepada perdagangan komoditi mentah yang tidak mempunyai nilai ditambah yang tinggi serta kurang menghasilkan produk baharu. Industri sedia ada juga terlalu bergantung kepada pekerja asing dan hanya 37% daripada industri dalam sektor pembuatan dan 20% dalam sektor perkhidmatan mengguna pakai teknologi tinggi.
5. Berdasarkan Laporan Tahunan Bank Negara Malaysia 2017, gaji pekerja Malaysia adalah lebih rendah dan tidak setimpal berbanding dengan produktiviti buruh.
6. Bahagian pampasan pekerja kepada KDNK Malaysia masih rendah iaitu 35.7% pada tahun 2018 berbanding negara maju seperti Jerman sebanyak 51.5%, United Kingdom 49.4% dan Korea Selatan 45.7%.
7. Oleh yang demikian, objektif pertama WKB adalah untuk menstruktur semula ekonomi ke arah yang lebih progresif, berpaksikan ilmu dan bernilai tinggi. Penekanan akan diberikan kepada peningkatan produktiviti sebagai salah satu pemacu pertumbuhan ekonomi. Usaha juga akan dilaksanakan bagi menggalakkan industri untuk mempergiat aktiviti pertumbuhan ekonomi masa hadapan yang bernilai tinggi. Selain memperkukuhkan sektor pertumbuhan ekonomi sedia ada, Kerajaan akan terus meningkatkan inisiatif pendigitalan dan penerimgunaan teknologi secara lebih meluas terutamanya dalam kalangan Perusahaan Kecil dan Sederhana (PKS).
8. Selain daripada isu struktur, masih wujud jurang ekonomi yang ketara di setiap peringkat kumpulan pendapatan, wilayah, etnik, dan rangkaian bekalan. Objektif kedua WKB akan menumpukan kepada usaha untuk merapatkan jurang tersebut. Jurang pendapatan yang ketara di antara kelas pendapatan berlaku berikutan pendapatan kumpulan isi rumah B40 lebih bergantung kepada penggajian dan kumpulan ini juga kurang memiliki aset yang boleh menjana pendapatan lain. Kerajaan yakin tumpuan kepada aktiviti ekonomi bernilai tinggi dan pewujudan pekerjaan berpendapatan tinggi akan menyumbang kepada usaha untuk merapatkan jurang ekonomi antara kumpulan pendapatan.

NO. SOALAN : 4

9. Di samping itu, Teras Strategik 5 WKB, Kesejahteraan Sosial, memberi penekanan kepada kebajikan semua kelompok masyarakat terutamanya golongan rentan ekonomi dan kumpulan isi rumah B40.

10. Dalam konteks jurang pembangunan antara wilayah, khususnya kawasan bandar dan luar bandar, Kerajaan sedar bahawa jurang pengagihan ekonomi antara kedua-dua kawasan semakin melebar. Dalam Teras Strategik Kedua, terdapat 15 cadangan Aktiviti Pertumbuhan Ekonomi Utama (KEGA). Antaranya ialah tumpuan kepada Pertanian Pintar yang akan meningkatkan produktiviti hasil tanaman terutamanya untuk agropeneur di luar bandar.

11. Selain itu, penekanan kepada Komoditi Malaysia 2.0 membolehkan tumpuan diberikan kepada penghasilan produk hiliran daripada komoditi, seperti sawit dan getah, supaya dapat menjana nilai ditambah dan pulangan yang lebih tinggi. Dalam Teras Strategik keenam WKB pula, iaitu Keterangan Wilayah, pemetaan titik tumpuan ekonomi, dengan izin, *economic hot spots*, akan dilaksanakan. Usaha ini bagi mengenal pasti kawasan luar bandar yang berpotensi sebagai pusat aktiviti ekonomi yang mampan. Malaysia akan memanfaatkan peluang daripada perkembangan peralihan ekonomi dunia dari Eropah ke Asia dengan menjadikan negara sebagai Hub Ekonomi ASEAN.

12. Bagi mengembleng pelbagai usaha di bawah WKB, dasar, strategi dan inisiatif khusus sedang dirangka oleh Kerajaan dan dijadual akan dibentangkan dalam Rancangan Malaysia Kedua Belas (RMKe-12) pada tahun hadapan. Penjajaran WKB akan diteruskan dalam Rancangan Malaysia Ketiga Belas (RMKe-13).

13. Kerajaan yakin matlamat WKB untuk melihat seluruh rakyat mengecapi satu kehidupan wajar menjelang 2030 akan dapat direalisasikan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN SANISVARA NETHAJI RAYER
A/L RAJAJI [JELUTONG]**

TARIKH : 4 NOVEMBER 2019 (ISNIN)

SOALAN

Minta **MENTERI BELIA DAN SUKAN** menyatakan apakah langkah-langkah yang akan diambil oleh Kerajaan Malaysia untuk menjamin keselamatan para penyokong dan pemain bola sepak Malaysia ketika berada di Indonesia dan memastikan kejadian yang berlaku baru-baru ini tidak berulang.

JAWAPAN

Yang di-Pertua,

1. Untuk makluman Ahli Yang Berhormat, Kementerian Belia dan Sukan (KBS) amat prihatin terhadap keselamatan pasukan kebangsaan dan pasukan penyokongnya di mana-mana perlawanan sama ada di dalam atau di luar negara. Berkenaan insiden yang telah dibangkitkan oleh YB Jelutong berkaitan insiden yang berlaku ketika perlawanan pusingan ke-2 Kelayakan Piala Dunia 2022 / Piala Asia 2023 di mana pasukan kebangsaan bertemu dengan pasukan Indonesia di Stadium Bung Karno, Jakarta pada 5 September 2019 adalah satu yang dipandang serius oleh Kerajaan dan pihak Persatuan Bola Sepak Malaysia (FAM) telah pun mengambil tindakan proaktif bagi mengelakkan sebarang provokasi.

2. Sebelum perlawanan tersebut, pihak FAM telah mengambil tindakan sewajarnya dengan mengadakan dua (2) sesi mesyuarat bersama Pihak Berkuasa Tempatan Indonesia pada 20 Ogos dan 27 Ogos 2019 lalu. Mesyuarat yang turut dihadiri oleh Timbalan Komander Pasukan Simpanan Persekutuan (FRU) telah membincangkan aspek keselamatan pemain dan juga penyokong yang perlu diberi perhatian oleh Persatuan Sepak Bola Seluruh Indonesia (PSSI). PSSI dengan kerjasama Pihak Berkuasa Tempatan Indonesia telah mengambil tindakan dengan menyediakan polis pengiring dari lapangan terbang ke stadium khususnya untuk pasukan Harimau Malaya dan lebih 300 penyokong negara pada hari perlawanan berlangsung. Namun begitu, insiden rusuhan masih berlaku semasa perlawanan akibat tindakan agresif penyokong tuan rumah Indonesia.

3. Kementerian telah pun mengeluarkan kenyataan tegas supaya Konfederasi Bola Sepak Asia (AFC) dan Persatuan Bola Sepak Antarabangsa (FIFA) memberikan perhatian serius bagi menangani isu tersebut dan berharap tindakan sewajarnya diambil. Pihak FAM juga telah memastikan Pegawai Pertandingan (*Match Commissioner*) menghantar laporan kejadian kepada FIFA melalui AFC. Kes tersebut telah pun dibawa ke Jawatankuasa Disiplin FIFA dan PSSI telah dikenakan denda oleh FIFA

SOALAN NO : 5

sebanyak CHF45,000 (RM 191,700) berserta amaran ke atas kejadian yang telah berlaku di Jakarta.

4. Pada masa yang sama juga, FAM telah memohon khidmat nasihat daripada Konfederasi Bola Sepak Asia (AFC) untuk membantu menyediakan pelan komprehensif menjelang pertemuan perlawanan kedua dan seterusnya untuk perlawanan-perlawanan lain di masa akan datang supaya peristiwa ini tidak berlaku.

5. Sebagai makluman kepada Yang Berhormat juga, pihak Kementerian turut membincangkan isu tersebut dengan Menteri Pemuda dan Olahraga Indonesia (MENPORA) bagi kedua-dua negara mencari kaedah terbaik bagi membendung sensitiviti yang wujud di antara penyokong-penyokong Indonesia dan Malaysia kerana jika dilihat dari sejarah yang lalu, sensitiviti penyokong-penyokong sukan ini lebih menonjol melibatkan pertandingan-pertandingan sukan tertentu sahaja seperti bola sepak, badminton dan sepak takraw tetapi amat jarang terjadi semasa pertandingan sukan-sukan yang lain.

Sekian terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KETIGA, PENGGAL KEDUA, PARLIMEN KE-14
(DEWAN RAKYAT)

PERTANYAAN : LISAN
DARIPADA : DATO' SRI DR. HAJI ISMAIL BIN HAJI
ABD. MUTTALIB [MARAN]
TARIKH : 4 NOV 2019 (RABU)

SOALAN

DATO' SRI DR. HAJI ISMAIL BIN HAJI ABD. MUTTALIB [MARAN] minta **MENTERI INDUSTRI UTAMA** menyatakan apakah usaha dalam menangani penurunan stok minyak sawit Malaysia yang merosot 10.3 peratus dalam tempoh 10 bulan kepada 2.45 juta tan metrik. Bagaimanakah Kementerian bertindak dalam memastikan penurunan stok minyak sawit ini tidak memberi kesan kepada bekalan domestik dan eksport.

JAWAPAN

Tuan Yang Di-Pertua,

Stok minyak sawit Malaysia sedang mengalami trend penurunan pada tahun ini iaitu daripada 3 juta tan pada Januari 2019 kepada 2.25 juta tan pada Ogos 2019. Manakala paras stok minyak sawit semasa adalah sebanyak 2.45 juta tan pada 10 Oktober 2019 iaitu pada paras yang optimum.

Untuk makluman Yang Berhormat, pengurangan stok adalah fenomena yang positif kerana ia membuktikan usaha Kerajaan untuk meningkatkan eksport minyak sawit negara telah berjaya dilaksanakan. Berdasarkan rekod, eksport minyak sawit negara telah meningkat sebanyak 19.7% kepada 12.6 juta tan daripada Januari hingga Ogos 2019 berbanding 10.53 juta tan untuk tempoh yang sama pada tahun 2018. Ini akan menyumbang kepada kenaikan paras harga minyak sawit yang lebih baik.

Tuan Yang Di-Pertua,

Untuk makluman Yang Berhormat, Kerajaan telah menggantung duti eksport minyak sawit mentah (CPO) sehingga Disember tahun ini demi mengatasi situasi stok minyak sawit yang tinggi.

Kerajaan sememangnya berusaha untuk menurunkan paras stok minyak sawit negara ke satu paras yang optimum, kerana penawaran minyak sawit pada awal tahun ini telah berada pada paras yang melebihi permintaannya iaitu 3 juta tan. Kementerian saya telah cuba sedaya upaya untuk mengurangkan stok minyak sawit bagi menstabilkan harga minyak sawit dan demi meningkatkan pendapatan kepada keseluruhan rangkaian industri sawit termasuk pekebun kecil.

Namun begitu, Kementerian saya sentiasa memantau situasi stok minyak sawit negara agar ianya berada di paras yang optimum bagi menampung permintaan semasa pasaran tempatan.

Tuan Yang Di-Pertua,

Antara langkah-langkah Kerajaan dalam memastikan bekalan minyak sawit sentiasa mencukupi di pasaran samada untuk pasaran tempatan mahupun eksport adalah seperti berikut :

- i. mengadakan siri perbincangan dengan pihak *refinery* supaya mereka tidak mengimport terlalu banyak minyak sawit dari negara luar tetapi sebaliknya menggunakan stok minyak sawit tempatan; dan
- ii. menurunkan kadar duti eksport ke atas minyak sawit mentah bermula 1 Januari 2020 daripada 4.5% kepada 3% demi membantu industri sawit untuk mengeksport minyak sawit pada harga yang lebih kompetitif.

Secara amnya, bekalan minyak sawit bagi tahun 2019 dijangka akan sentiasa mencukupi kerana paras bekalan stok minyak sawit di pasaran melebihi paras 2 juta tan atau melebihi paras minimum 5.0% daripada jumlah pengeluaran minyak sawit mentah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN HASSAN BIN ABDUL KARIM
[PASIR GUDANG]**

TARIKH : 4 NOVEMBER 2019 (ISNIN)

SOALAN

Minta **PERDANA MENTERI** menyatakan adakah Kerajaan Persekutuan bercadang untuk meminda Kanun Tanah Negara (Akta 56/1965) supaya Kerajaan Negeri mengiktiraf tanah adat Orang Asli.

**JAWAPAN: YB TUAN MOHAMED HANIPA BIN MAIDIN, TIMBALAN
MENTERI DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat,

Kerajaan menerusi Jabatan Ketua Pengarah Tanah dan Galian (JKPTG) berpandangan bahawa tiada keperluan untuk meminda Kanun Tanah Negara (KTN) kerana seksyen 4 KTN telah memberi kekecualian kepada tanah adat dan perundangan tanah adat akan mengatasi peruntukan KTN.

Seksyen 4 KTN menyatakan :

(1)Tiada apa jua dalam Akta ini boleh menyentuh apa-apa pelaksanaan yang lama, atau apa-apa yang dibuat di bawah, mana-mana undang-undang tanah terdahulu atau setakat mana ia berkait dengan tanah, peruntukan-peruntukan mana-

mana undang-undang yang diluluskan sebelum bermulanya Akta ini:

Dengan syarat bahawa mana-mana hak, kebebasan, keistimewaan, obligasi atau tanggungan yang wujud pada permulaan akta ini menurut kuasa mana-mana undang-undang sedemikian hendaklah, kecuali sebagaimana peruntukan dengan nyata selepas ini, tertakluk kepada peruntukan-peruntukan Akta ini.

(2) kecuali setakat mana yang diperuntukan dengan nyata sebaliknya, tiada apa jua dalam Akta ini hendaklah menyentuh peruntukan-peruntukan –

(a) mana-mana undang-undang buat masa ini berkuatkuasa berhubung dengan pemegangan secara adat.

(b) mana-mana undang-undang buat masa itu berkuatkuasa berhubung dengan rizab Melayu atau pegangan Melayu;

(c) mana-mana undang-undang buat masa itu berkuatkuasa berhubung dengan perlombongan;

(d) mana-mana undang-undang buat masa itu berkuatkuasa berhubung dengan tanah kesultanan;

(e) mana-mana undang-undang buat masa itu berkuatkuasa berhubung dengan wakaf atau bait-ul-mal;

(f) Enakmen Penempatan Terengganu, 1356;

(g) Ordinan Penanam Padi (Mengawal Sewa dan Menjamin Pemegangan), 1955;

(h) Ordinan Penempatan Tanah Kelantan, 1955;

(i) Akta Tanah (Kawasan Penempatan Berkelompok), 1960;

(ia) Enakmen Penempatan Tanah Perlis 1966; atau

(j) mana-mana undang-undang buat masa itu berkuatkuasa berhubungan dengan pengecualian dari pembayaran hasil tanah;

dan, dalam ketiadaan peruntukan nyata sebaliknya, jika mana-mana peruntukan Akta ini tidak konsisten dengan mana-mana peruntukan undang-undang sedemikian, maka peruntukan undang-undang yang kemudian hendaklah mengatasi, dan peruntukan yang dahulu hendaklah, setakat mana ketidakselarasan itu, terbatal.

Justeru itu, cadangan untuk mengiktiraf tanah adat Orang Asli perlu dinyatakan melalui perundangan lain atau melalui pindaan kepada Akta Orang Asli 1954 [Akta 134] bagi menetapkan bentuk pengiktirafan yang dikehendaki dan Kerajaan Negeri akan mematuhi perundangan yang ada.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD JOHNIE BIN ZAWAWI [IGAN]

TARIKH : 04 NOVEMBER 2019 (ISNIN)

SOALAN

Minta **MENTERI HAL EHWAL EKONOMI** menyatakan apakah perancangan pihak FELCRA BHD di kawasan Parlimen Igan untuk meningkatkan hasil pendapatan para peserta tanaman kelapa sawit. Apakah pihak FELCRA BHD mempunyai perancangan meluaskan kawasan tanaman kelapa sawit. Berapa jumlah dividen yang telah dibayar oleh FELCRA BHD selama ini kepada setiap peserta dan senaraikan mengikut nama dan keluasan.

JAWAPAN

Tuan Yang di-Pertua,

1. Untuk makluman Ahli Yang Berhormat, bagi memastikan tahap pengeluaran sawit yang optimum dapat dicapai supaya pulangan hasil yang lebih baik kepada peserta, FELCRA telah melaksanakan pemerkasaan pengurusan ladang termasuk ladang-ladang di kawasan Parlimen Igan.
2. Antara tindakan yang telah diambil adalah seperti mengadaptasi sistem penuaian yang lebih sistematik (*Block Harvesting System*) menerusi aplikasi sistem D10 di mana penuaian buah tandan segar dapat dituai secara optimum dan meningkatkan tahap pematuhan disiplin pekerja.

3. FELCRA juga mempertingkatkan penggunaan mekanisasi bagi pengurusan rumpai, pembajaan dan pemeliharaan tanaman. Di samping itu, penyelenggaraan infrastruktur seperti jalan pertanian dan perparitan dilaksanakan secara berkala supaya ia berfungsi dengan baik.
4. Perancangan FELCRA Berhad untuk meluaskan kawasan tanaman sawit bergantung kepada kesesuaian dari segi keluasan dan daya maju kawasan yang akan dibangunkan. Sebanyak lapan (8) buah projek berkeluasan 453 hektar telah disenaraikan sebagai cadangan projek kawasan tanaman sawit baharu di negeri Sarawak. Daripada jumlah tersebut, terdapat sebuah projek tanaman sawit baharu melibatkan kawasan seluas 53 hektar dengan seramai 107 orang peserta di kawasan Parlimen Igan bakal dimajukan pada tahun 2020.
5. Jumlah dividen keseluruhan yang diterima oleh 2,009 orang peserta dalam Kawasan Parlimen Igan pada tahun 2017 adalah sebanyak RM5.25 juta dan pada 2018 adalah sebanyak RM262,520.11.
6. Pencapaian purata produktiviti di Kawasan Igan adalah berada pada tahap yang baik iaitu 26 metrik tan per hektar. Namun, kejatuhan harga sawit telah memberi kesan penurunan kepada jumlah dividen tersebut. Selain daripada itu, elemen pembayaran balik hutang pembangunan berjadual berjumlah RM30 juta setahun turut menjejaskan pendapatan keseluruhan projek di Parlimen Igan. FELCRA telah bersetuju supaya bayaran balik hutang kos pembangunan ini ditangguhkan secara sementara bagi tahun 2019 sehingga 2020 bagi mengimbangi kejatuhan harga komoditi ini.

Sekian, terima kasih.

**PEMBERITAHUAN PERTANYAAN DEWAN NEGARA
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATUK WIRA HAJAH MAS ERMIEYATI
BINTI SAMSUDIN [MASJID TANAH]**

TARIKH : 4 NOVEMBER 2019 (ISNIN)

SOALAN

Minta **MENTERI PENGANGKUTAN** menyatakan apakah impak Projek *Kuala Linggi International Port* terhadap geopolitik, ekonomi dan sosial penduduk setempat.

JAWAPAN

Yang Di-Pertua,

1. Untuk makluman Ahli Yang Berhormat, cadangan pembangunan Kuala Linggi International Port adalah merupakan satu inisiatif pembangunan pelabuhan daripada pihak swasta dan Kerajaan pada masa ini belum mengambil sebarang keputusan dasar berhubung cadangan tersebut.
2. Berdasarkan kepada pelan induk pembangunannya, Kuala Linggi International Port (KLIP) akan berfungsi sebagai pelabuhan industri yang antara lain sebagai hab bagi aktiviti *bunkering* dan *port of refuge* bagi kapal-kapal dagang yang melalui perairan Selat Melaka.
3. Cadangan pembangunan projek Kuala Linggi International Port telah diperhalusi dan diteliti oleh Kerajaan melalui platform Majlis Pembangunan Fizikal Negara (MPFN) pada 24 Oktober 2019 antaranya seperti berikut:

NO. SOALAN : 9

- (i) menambahkan jarak anjakan dari sempadan maritim Negeri Sembilan serta mengurangkan keluasan tambakan di bahagian selatan pembangunan projek ke Negeri Melaka;
- (ii) menyediakan Laporan Impak Ekonomi (EcIA) bagi membuktikan cadangan pembangunan ini lebih memberikan manfaat ekonomi mengatasi kos sosial dan alam sekitar;
- (iii) memastikan pembangunan ini tidak memberi saingan dan menjejaskan jeti Kuala Linggi sedia ada dan mengambil kira penemuan kajian *National Port Strategy* (NPS) yang telah dijalankan oleh Unit Perancang Ekonomi, Jabatan Perdana Menteri melalui kerjasama dengan pihak *World Bank Group* pada tahun 2016;
- (iv) mengenal pasti jangkaan pengurangan hasil perikanan akibat daripada kesan cadangan pembangunan pelabuhan ini;
- (v) mengambil kira kesan kepada ekosistem hutan paya bakau sedia ada dan penduduk tempatan;
- (vi) mengambil kira lokasi sumber pasir bagi aktiviti tambakan;
- (vii) mensasarkan pengurangan sebanyak 45% pelepasan karbon melalui rekabentuk bangunan hijau; dan
- (viii) merangka Pelan Tindakan Kecemasan (*Emergency Response Plan*).

4. Untuk makluman Ahli Yang Berhormat juga, sebarang pembangunan melibatkan sektor pengangkutan maritim adalah tertakluk kepada kajian-kajian asas seperti *Environment Impact Assesment* (EIA), Kajian Hidrografi dan *Marine Traffic Risk Assesment* (MTRA).

Sekian, terima kasih.

**DEWAN RAKYAT PEMBERITAHUAN PERTANYAAN LISAN
MESYUARAT KETIGA, PENGGAL KEDUA
PARLIMEN KEEMPAT BELAS (2019)**

PERTANYAAN : LISAN

**DARIPADA : YB TUAN AHMAD FADHLI BIN SHAARI
[PASIR MAS]**

TARIKH : 4 NOVEMBER 2019 (ISNIN)

SOALAN

Minta **PERDANA MENTERI** menyatakan perkembangan kod etika berpakaian untuk pekerja wanita Islam sektor swasta yang telah dinyatakan oleh Menteri di Jabatan Perdana Menteri pada tahun lepas yang akan dilaksanakan selewat-lewatnya hujung tahun 2018.

**JAWAPAN: (YB PUAN HAJJAH FUZIAH SALLEH, TIMBALAN
MENTERI DI JABATAN PERDANA MENTERI)**

Tuan Yang di-Pertua,

1. Untuk makluman Ahli Yang Berhormat, kerajaan pada hari ini yang membawa pendekatan Rahmatan Lil Alamin mengambil berat dan memandangkan serius hak semua pekerja. Dan dalam hal ini, khusus berkaitan hak pekerja wanita Islam di dalam mematuhi Kod Etika Pakaian di tempat kerja. Justeru itu, Deraf Garis Panduan Etika Berpakaian Di Tempat Kerja Bagi Sektor Swasta telah dibangunkan oleh Jabatan Tenaga Kerja, Kementerian Sumber Manusia secara bersama dengan Jabatan Kemajuan Islam Malaysia (JAKIM) telah selesai disemak dan diperakui oleh Panel Pakar Syariah JAKIM yang bersidang pada 12 dan 13 September 2018. Garis Panduan ini hanya terpakai kepada pekerja Muslim di sektor swasta dan tidak tertakluk kepada pekerja bukan Islam.

2. Sebagaimana yang telah dimaklumkan oleh YB Timbalan Menteri Sumber Manusia dalam dewan yang mulia ini pada 29 Oktober 2019

NO. SOALAN : 10

yang lalu, Kementerian Sumber Manusia dan JAKIM sedang membuat semakan akhir terhadap draf garis panduan tersebut sebelum ianya dimuktamadkan untuk pemakaian dan pelaksanaan di sektor swasta. Oleh kerana perkara ini perlu melalui beberapa peringkat perundingan selanjutnya dengan pihak-pihak berkepentingan, JAKIM akan terus bekerjasama dengan Kementerian Sumber Manusia bagi membolehkan Garis Panduan ini dilaksanakan.

3. Dalam hal ini, JAKIM turut memastikan diskriminasi terhadap wanita Islam untuk berpakaian menutup aurat dapat diatasi selaras dengan artikel 8 yang menyatakan bahawa “semua orang adalah sama rata di sisi undang-undang dan berhak mendapat perlindungan yang sama rata di sisi undang-undang kecuali sebagaimana yang dibenarkan dengan nyata oleh Perlembagaan ini tidak boleh ada diskriminasi terhadap warganegara semata-mata atas alasan agama, ras, keturunan, tempat lahir atau jantina dalam mana-mana undang-undang atau dalam pelantikan kepada apa-apa jawatan atau pekerjaan”.

4. Dalam hal ini, JAKIM juga akan meneliti untuk mencadangkan kepada Kementerian Sumber Manusia (KSM) bahawa Kod etika berpakaian dan amalan syarikat hendaklah patuh syariah dan tidak bertentangan dengan Perlembagaan Persekutuan, Undang-Undang Bertulis atau apa-apa perkara yang menyentuh sensitiviti agama, kaum, bangsa, budaya, dan kawasan. Seseorang pekerja wanita hendaklah memakai pakaian tertakluk kepada kod etika berpakaian di tempat kerja yang diamalkan di tempat masing-masing selagi ia tidak bertentangan dengan syariat. Justeru, semua pihak hendaklah menghormati hak-hak yang terkandung dalam Perlembagaan Persekutuan demi menjaga perpaduan dalam kalangan masyarakat yang berbilang kaum.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : PUAN NOR AZRINA BINTI SURIP
[MERBOK]**

TARIKH : 4 NOVEMBER 2019 (ISNIN)

SOALAN

Minta **MENTERI BELIA DAN SUKAN** menyatakan usaha-usaha Kementerian bagi membantu persatuan dan pertubuhan belia yang berdaftar di bawah Pendaftar Pertubuhan Belia (ROY) bagi memupuk kepimpinan baru susulan penurunan had umur belia daripada 40 tahun kepada 30 tahun. Adakah Kementerian mempunyai inisiatif lain bagi membantu golongan yang tercicir daripada takrifan belia terus aktif berkhidmat dalam masyarakat.

JAWAPAN

Yang di-Pertua,

1. Untuk makluman Yang Berhormat, sehingga kini, sebanyak lebih kurang 44% daripada jumlah pemimpin pertubuhan belia berumur di bawah 30 tahun. Ini bermakna, kita telah mempunyai satu kumpulan pemimpin yang telah memenuhi syarat terbaru dalam Akta 668 tersebut.

2. Kementerian Belia dan Sukan telah menggariskan empat strategi bagi membantu pertubuhan belia sedia ada untuk memenuhi pindaan Akta 668.

i. Kementerian memberikan masa dan tempoh peralihan yang mencukupi, yang mana tarikh penguatkuasaan pindaan Akta 668 tersebut adalah pada 1 Januari 2022. Jika seseorang pemegang jawatan sesebuah pertubuhan belia telah dilantik pada tahun 2021 untuk tempoh dua (2) tahun, maka pemegang jawatan tersebut boleh menghabiskan tempoh perjawatannya sehingga tahun 2023. Secara keseluruhannya, pertubuhan-pertubuhan belia sedia ada mempunyai masa dua hingga empat tahun untuk memenuhi pindaan terbaru penurunan umur belia. Untuk makluman juga, perancangan dan perbincangan untuk menurunkan had umur belia telah bermula sejak tahun 2015 lagi.

ii. Keduanya, Pejabat Pertubuhan Belia (ROY) sentiasa mengadakan sesi libat urus (*engagement*). Pada tahun ini sahaja, Kementerian telah menganjurkan 15 Bengkel Tadbir Urus Pertubuhan Belia di setiap negeri melibatkan 766 orang peserta secara keseluruhannya. Bengkel tersebut bertujuan untuk memastikan pergerakan pertubuhan belia terus aktif dan mematuhi perkara-perkara yang telah diperuntukkan dalam Akta 668.

SOALAN NO: 11

iii. Ketiganya, menerusi penyelarasan semula dana kepada pertubuhan belia, Kementerian Belia dan Sukan kini hanya memberikan dana pentadbiran kepada pertubuhan belia di peringkat kebangsaan dan majoriti/jumlah besar dana tersebut disalurkan sebagai dana aktiviti kepada pertubuhan-pertubuhan belia yang lain. Ini bagi menggalakkan pertubuhan belia di negara kita supaya bergerak aktif menganjurkan aktiviti, serta melaksanakan program-program di setiap peringkat bagi menarik penyertaan ahli-ahli baharu dalam kalangan belia. Setakat ini, untuk tahun 2019, sebanyak RM14 juta telah disalurkan melalui dana aktiviti ini.

iv. Keempat, Kementerian Belia dan Sukan meneruskan sesi libat urus (*engagement*) dengan bekas pemimpin-pemimpin persatuan belia, untuk mendapatkan pengetahuan, pengalaman, sebagai usaha memperkukuhkan pergerakan pertubuhan belia. Sebagai contoh, KBS telah bekerjasama dengan Federasi Kebangsaan Pekerja Belia (FKPB) yang berdaftar di bawah Pendaftaran Pertubuhan Malaysia (ROS) yang berperanan sebagai mentor, kepada pertubuhan-pertubuhan belia yang lain.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI SARAVANAN A/L MURUGAN
(TAPAH)**

TARIKH : 4 NOVEMBER 2019 (ISNIN)

SOALAN

minta **PERDANA MENTERI** menyatakan bentuk bantuan yang disediakan khusus kepada masyarakat India melalui Jabatan Perdana Menteri ataupun Kementerian-kementerian lain terutama dalam membantu pembangunan ekonomi kaum India.

**JAWAPAN : YB SENATOR TUAN WAYTHA MOORTHY A/L
PONNUSAMY, MENTERI DI JABATAN PERDANA
MENTERI (PERPADUAN NEGARA DAN
KESEJAHTERAAN SOSIAL)**

Tuan Yang di-Pertua,

Untuk makluman Ahli Yang Berhormat, saya ingin maklumkan bahawa soalan yang sama telah diutarakan oleh Yang Berhormat pada 10 Julai 2019 dan saya telahpun memberikan penjelasan yang sewajarnya. Walau bagaimanapun, memandangkan Yang Berhormat telah membangkitkan soalan yang sama pada hari ini, saya akan memberi penjelasan sekali lagi.

Seperti Yang Berhormat sedia maklum, peruntukan kerajaan demi meningkatkan taraf sosioekonomi masyarakat India di Malaysia adalah disalurkan melalui Unit Transformasi Masyarakat India Malaysia (MITRA), salah sebuah agensi di bawah Jabatan Perdana Menteri

(JPM). Sejumlah RM 100 juta telah diluluskan bagi tahun 2019. Peruntukan ini adalah untuk membantu masyarakat India Malaysia, terutamanya golongan B40 bagi meningkatkan kualiti hidup mereka melalui pelaksanaan pelbagai program, latihan dan kursus dalam bidang-bidang terpilih. Program sebegini dapat meningkatkan kapasiti dan menjadikan masyarakat India di Malaysia lebih berkebolehan, berdaya saing dan mempunyai kompetensi yang diperlukan serta tidak lagi tergolong dalam kemiskinan tegar.

Dalam hal ini, MITRA dipertanggungjawabkan dalam memastikan peruntukan yang diberikan sampai kepada masyarakat India Malaysia pada peringkat akar umbi agar jurang polarisasi sosioekonomi *inter* dan *intra* kaum dapat ditangani. Program-program pembangunan sosioekonomi bagi masyarakat India di Malaysia yang dilaksanakan melalui Jabatan Perdana Menteri, iaitu dalam hal ini adalah MITRA, telahpun dijelaskan dalam sesi-sesi sebelum ini secara terperinci.

Secara ringkasnya, bentuk bantuan khusus yang disediakan kepada masyarakat India boleh dibahagikan kepada empat bidang iaitu; (i) pendidikan dan latihan, (ii) ekonomi dan kerjaya, (iii) kebajikan dan sosial serta (iv) kerohanian dan keagamaan.

Pada masa ini, MITRA sedang dalam pelbagai peringkat pelaksanaan bagi **211 program dan aktiviti** melalui kerjasama strategik dengan badan-badan bukan kerajaan, syarikat, pertubuhan, persatuan serta institusi pengajian tinggi swasta yang mempunyai kepakaran serta pengalaman khusus dalam bidang-bidang keutamaan yang dikenal pasti oleh MITRA bagi tahun ini.

Selain itu, MITRA juga turut bekerjasama dengan Kementerian dan Agensi Kerajaan bagi membolehkan **masyarakat India turut menerima bantuan sewajarnya dan melibatkan diri dalam inisiatif-inisiatif Kerajaan yang bertujuan untuk membangunkan semua rakyat Malaysia tanpa mengira kaum. Berkaitan ini, masyarakat India juga mempunyai peluang yang sama untuk menikmati inisiatif-inisiatif tersebut.** Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN STEVEN CHOONG SHIAU
YOON [TEBRAU]**

TARIKH : 04 NOVEMBER 2019 [ISNIN]

SOALAN NO.13

Minta **MENTERI AIR, TANAH DAN SUMBER ASLI** menyatakan apa sebabnya loji-loji rawatan kumbahan dan sistem-sistem pembetungan dalam kawasan Majlis Perbandaran Pasir Gudang (MPPG) dan Majlis Bandaraya Johor Bharu (MBJB) masih belum diambil alih oleh Indah Water Konsortium (IWK) dan apakah langkah-langkah yang telah diambil oleh kerajaan pusat untuk memastikan MPPG dan MBJB tidak berkurangan dana untuk membuat kerja penyelenggaraan semua loji rawatan kumbahan dan sistem pembetungan.

JAWAPAN

Tuan Yang di-Pertua,

1. Berdasarkan kepada Seksyen 3(2) Akta Industri Perkhidmatan Air 2006 (Akta 655), Kerajaan Persekutuan hendaklah terus mempunyai kuasa eksekutif berkenaan dengan segala perkara yang berhubungan dengan sistem pambesian dan perkhidmatan pambesian di seluruh Malaysia. Manakala Indah Water Konsortium Sdn Bhd (IWK) selaku pemegang konsesi seperti yang termaktub di dalam Seksyen 191 (1) Akta 655 sebagai orang diberi kuasa untuk menjalankan perkhidmatan pengoperasian dan penyelenggaraan sistem pambesian termasuk di dalam kawasan Majlis Bandaraya Johor Baharu (MBJB) dan Majlis Perbandaran Pasir Gudang (MPPG).
2. Kerajaan mengakui keperluan pengambilalihan operasi pambesian di kawasan MBJB dan MPPG demi memastikan perkhidmatan pambesian yang sistematik dapat dinikmati oleh penduduk di kedua-dua kawasan tersebut. Oleh itu, satu perbincangan telah diadakan bersama pihak YAB Menteri Besar Johor pada 19 Ogos 2019. Dalam pertemuan tersebut, Kerajaan Negeri Johor telah menyatakan pendirian tidak bersetuju dengan cadangan pengambilalihan ini.

NO. SOALAN : 13

3. Susulan itu, satu surat bagi menegaskan pentingnya pengambilalihan ini telah dikemukakan kepada YAB Menteri Besar Johor pada 21 Ogos 2019. Adalah dijangkakan Kerajaan Negeri Johor akan mengemukakan maklum balas terhadap perkara ini dalam tempoh masa terdekat untuk tindakan selanjutnya.

Tuan Yang di-Pertua,

4. Pada masa ini, Suruhanjaya Perkhidmatan Air Negara (SPAN) masih memberi kuasa kepada kedua-dua Pihak Berkuasa Tempatan (PBT) iaitu MBBB dan MPPG untuk melaksanakan pengoperasian perkhidmatan pembetungan bagi tempoh interim. Kerajaan mengakui kedua-dua PBT tersebut mempunyai kekangan kewangan untuk menyelenggara loji rawatan kumbahan dengan sempurna. Oleh itu, pengambilalihan operasi pembetungan di MBBB dan MPPG ini akan membuka ruang bagi perbelanjaan dikeluarkan oleh Kerajaan Persekutuan untuk menaik taraf loji-loji rawatan kumbahan di kedua-dua kawasan tersebut supaya ia mematuhi piawaian pelepasan efluen yang telah ditetapkan oleh Jabatan Alam Sekitar (JAS).

Sekian, terima kasih

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : YB DATIN MASTURA BINTI MOHD YAZID
[KUALA KANGSAR]

TARIKH : 04 NOVEMBER 2019 (ISNIN)

SOALAN

Minta **MENTERI SUMBER MANUSIA** menyatakan bilakah jangkaan bandar integrasi Pendidikan Teknikal dan Latihan Vokasional (TVET) akan disiapkan sepenuhnya, dan apakah matlamat jangka panjang yang ingin dicapai oleh Kementerian melalui kewujudan bandar integrasi tersebut.

JAWAPAN

Tuan Yang di-Pertua,

Cadangan pembinaan sebuah bandar integrasi Pendidikan Teknikal dan Latihan Vokasional (TVET) hanya satu cadangan awal dan ia dilontarkan bagi mendapatkan pandangan. Kementerian ini sentiasa terbuka untuk menerima sebarang pandangan dan cadangan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN NOOR AMIN BIN AHMAD [KANGAR]

TARIKH : 4 NOVEMBER 2019 (ISNIN)

SOALAN

Minta **PERDANA MENTERI** menyatakan apakah hasil siasatan SPRM dan polis ke atas dapatan Jawatankuasa Siasatan Tadbir Urus, Perolehan dan Kewangan Kerajaan yang diketuai oleh Tan Sri Ambrin Buang yang menyatakan terdapat 16 kes tukaran tanah (*landswap*) yang menyebabkan kerugian besar kepada Kerajaan Malaysia. Adakah tukaran tanah ini telah dibatalkan oleh Kementerian Pertahanan.

**JAWAPAN : YB TUAN MOHAMED HANIPA BIN MAIDIN,
TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman Yang Berhormat Kangar, pihak SPRM telah membuka 1 kertas siasatan berhubung isu tohmahan rasuah berkaitan dengan tukaran tanah (*landswap*) dan selaras dengan peruntukan seksyen 29 (4) Akta SPRM 2009, Suruhanjaya ini tidak dapat mendedahkan butiran siasatan tersebut.

Namun perlu ditekankan bahawa masa yang material berkenaan projek-projek *landswap* tersebut adalah dari tahun 1997 sehingga 2018. Mengenai status tukaran tanah (*landswap*), pihak Kementerian Pertahanan mengesahkan bahawa pelaksanaan projek-projek *landswap* ini berada dipelbagai peringkat pelaksanaan. Sebanyak 6 projek siap, 1 projek gagal, 1 projek dalam pembinaan, 1 projek dalam tempoh *condition precedent* dan 7 projek telah memperolehi kelulusan prinsip. Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : YB TUAN ABDUL LATIFF BIN ABDUL RAHMAN [KUALA KRAI]

TARIKH : 04 NOVEMBER 2019 (ISNIN)

SOALAN

Minta **MENTERI SUMBER MANUSIA** menyatakan:-

- (a) berapa jumlah pelajar lepasan Sijil Pelajaran Malaysia (SPM) yang terus bekerja berbanding yang menyambung belajar ke kolej atau universiti; dan
- (b) apakah langkah Kerajaan untuk memberi peluang pendidikan kepada lepasan SPM yang terus bekerja.

JAWAPAN

Tuan Yang di-Pertua,

1. Untuk makluman Dewan yang mulia ini, berdasarkan Survei Tenaga Buruh (STB) 2018, penduduk bekerja yang berumur 18 tahun lepasan Sijil Pelajaran Malaysia (SPM), di Malaysia ialah 99,600 orang. Penduduk bekerja yang berumur 18 tahun lepasan SPM, Malaysia, 2017 dan 2018 adalah seperti di Jadual 1. Manakala, Penduduk luar tenaga buruh yang berumur 18 tahun lepasan Sijil Pelajaran Malaysia (SPM) yang masih belajar, Malaysia, 2017 dan 2018 adalah seperti di Jadual 2

Jadual 1

Penduduk bekerja yang berumur 18 tahun lepasan Sijil Pelajaran Malaysia (SPM), Malaysia, 2017 dan 2018

(‘000)

	2017	2018
Bilangan	88.4	99.6

Sumber: Survei Tenaga Buruh, Jabatan Perangkaan Malaysia

Jadual 2

Penduduk luar tenaga buruh yang berumur 18 tahun lepasan Sijil Pelajaran Malaysia (SPM) yang masih belajar, Malaysia, 2017 dan 2018

(‘000)

	2017	2018
Bilangan	232.7	257.4

Sumber: Survei Tenaga Buruh, Jabatan Perangkaan Malaysia

Tuan Yang di-Pertua,

2. Jabatan Tenaga Manusia mempunyai 32 buah Institut Latihan Jabatan Tenaga Manusia (ILJTM) yang menawarkan 963 kursus jangka pendek yang meliputi pelbagai bidang kemahiran untuk meningkatkan kemahiran dan pengetahuan pekerja sedia ada di industri termasuk kepada lepasan SPM yang terus bekerja. Kursus-kursus jangka pendek ini dibuka penyertaannya sepanjang tahun, dan waktu pelaksanaannya adalah fleksibel bermula daripada jam 8.00 pagi hingga 11.00 malam. Pelaksanaan kursus ini adalah berdasarkan kepada keperluan dan permintaan daripada peserta.

3. ILJTM membuat hebahan dan promosi secara berterusan berkaitan tawaran pelaksanaan kursus-kursus jangka pendek ini melalui pelbagai medium media massa dan media sosial.

Tuan Yang di Pertua,

4. Di samping itu, Kementerian Sumber Manusia melalui Kumpulan Wang Pembangunan Sumber Manusia (KWPSM) telah melaksanakan inisiatif peluang pendidikan kepada pekerja-pekerja yang diliputi di bawah Akta PSMB 2001 termasuklah kepada lepasan SPM yang bekerja dengan majikan yang berdaftar dengan KWPSM bagi tempoh Januari 2019 hingga September 2019. Inisiatif tersebut adalah seperti berikut:

- a) Skim Bantuan Latihan (SBL) dan Skim Bantuan Latihan – Khas (SBL – Khas) memberi peluang kepada majikan untuk melatih pekerja lepasan SPM di dalam meningkatkan kemahiran selaras dengan keperluan industri mereka. KWPSM telah meluluskan latihan kepada 207,636 pekerja lepasan SPM dengan bantuan kewangan berjumlah RM93,881,915.00.
- b) Program *Recognition of Prior Experiential Learning* (RPEL) memberi peluang kepada pekerja lepasan SPM menyambung pengajian dengan persijilan Sijil Kemahiran Malaysia (SKM) Tahap 3, SKM Tahap 4 atau Diploma Kemahiran Malaysia (DKM) daripada Jabatan Pembangunan Kemahiran (JPK). KWPSM telah meluluskan 461 pekerja lepasan SPM bagi mengikuti persijilan ini dengan bantuan kewangan berjumlah RM314,820.00.
- c) Program SLDN-Perantisan di bawah Skim Inisiatif Strategik memberi peluang kepada lepasan SPM untuk menghadiri latihan bagi meningkatkan kemahiran dan seterusnya mendapat persijilan SKM daripada JPK. Pelatih akan diberikan elaun dan yuran latihan yang dibiayai sepenuhnya oleh KWPSM dan majikan berdaftar dengan KWPSM. Seramai 113 pekerja lepasan SPM telah mendapat latihan dengan bantuan kewangan berjumlah RM1,019,379.84.

**PEMBERITAHUAN PERTANYAAN DEWAN NEGARA
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATUK DR. HASAN BIN BAHROM
[TAMPIN]**

TARIKH : 4 NOVEMBER 2019

SOALAN

Minta **MENTERI PENGANGKUTAN** menyatakan tahap keberkesanan pengangkutan awam di negara ini, terutamanya perkhidmatan bas ekspres. Bagaimana Kementerian mengatasi sekiranya berlaku kesesakan di lebuhraya. Adakah Kementerian bercadang untuk mengadakan suatu laluan khas atau sistem yang baru di lebuhraya dari utara ke selatan bagi menjamin bas-bas ekspres tersebut tidak terlewat tiba ke destinasi dituju.

JAWAPAN

Yang di-Pertua,

Berdasarkan polisi semasa, pemandu bas ekspres boleh menggunakan jalan atau laluan alternatif jika berlaku kesesakan di lebuhraya tetapi dengan syarat pemandu bas ekspres perlu berhenti di terminal/hentian seperti mana di dalam permit perkhidmatan yang telah diluluskan oleh APAD. Cadangan untuk mengadakan suatu laluan khas bas ekspres atau sistem yang baru di lebuhraya dari utara ke selatan akan menyebabkan berlaku kesesakan untuk mod pengangkutan yang lain.

Sekian, terima kasih.

PEMBERITAHUAN PERTANYAAN
MESYUARAT KETIGA, PENGGAL KEDUA,
PARLIMEN KEEMPAT BELAS,
DEWAN RAKYAT

PERTANYAAN : LISAN

DARIPADA : DATUK ALEXANDER NANTA LINGGI [KAPIT]

TARIKH : 4 NOVEMBER 2019

SOALAN

DATUK ALEXANDER NANTA LINGGI [KAPIT] minta **PERDANA MENTERI** menyatakan dengan jelas apakah bilangan dan pangkat penjawat perkhidmatan awam dari kaum Dayak yang diambil berkhidmat di jabatan dan agensi Kerajaan Persekutuan sekarang sudah bertambah banyak dan pangkat mereka dinaikkan.

JAWAPAN: YB TUAN MOHAMED HANIPA BIN MAIDIN
TIMBALAN MENTERI DI JABATAN PERDANA MENTERI

Tuan Yang di-Pertua,

Untuk makluman Ahli Yang Berhormat, Pecahan Kumpulan Perkhidmatan bagi Kaum Dayak di Perkhidmatan Awam Persekutuan bagi tahun 2019 adalah seperti berikut:

Kumpulan Perkhidmatan	Jumlah Pegawai Kaum Dayak
Kumpulan Pelaksana	20,777
Kumpulan Pengurusan dan Profesional	10,158
Kumpulan Pengurusan Tertinggi	21
JUMLAH	30,956

Kerajaan tanpa mengira kaum, bangsa dan agama sentiasa memberi ruang dan peluang yang saksama kepada penjawat awam untuk diberi kenaikan pangkat selaras dengan peruntukan di bawah Pekeliling Perkhidmatan Bilangan 7 Tahun 2010 - Panduan Pengurusan Pemangkuan Dan Kenaikan Pangkat Dalam Perkhidmatan Awam.

Kerajaan juga tidak pernah menetapkan kuota bagi mana-mana kaum tertentu termasuk kaum dayak dalam urusan kenaikan pangkat. Memandangkan bilangan jawatan-jawatan di peringkat pengurusan tertinggi adalah terhad, proses pertimbangan pengisian perlu melalui suatu proses pemilihan yang ketat berdasarkan **merit, prestasi, kelayakan, kompetensi, daya kepimpinan, pengalaman, integriti dan kesesuaian penerimaan di peringkat Kementerian atau Jabatan**. Ini adalah bagi memastikan, pegawai yang mengisi jawatan-jawatan berkenaan adalah terdiri daripada pegawai yang kompeten dan berkebolehan.

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

**DARIPADA : YB DATO' ABDULLAH SANI BIN ABDUL
HAMID [KAPAR]**

TARIKH : 04 NOVEMBER 2019 (ISNIN)

SOALAN

Minta **MENTERI SUMBER MANUSIA** menyatakan statistik pekerja asing yang sah dan tidak sah dan apakah pelan tindakan Kementerian berhubung perkara ini.

JAWAPAN

Tuan Yang di-Pertua,

1. Berdasarkan statistik Jabatan Imigresen Malaysia sehingga 31 Ogos 2019, jumlah pekerja asing yang berdaftar dan dikeluarkan Pas Lawatan Kerja Sementara (PL(KS)) adalah 1,994,120 orang. Sektor perkilangan adalah sektor tertinggi yang menggajikan pekerja asing iaitu seramai 706,502, diikuti sektor pembinaan 429,552, sektor perladangan 268,203, sektor pertanian 150,003 dan pembantu rumah 130,450. Manakala, data berhubung pekerja asing tidak sah tidak dapat ditentukan.

2. Pihak Kementerian Sumber Manusia hanya boleh mengemukakan langkah-langkah yang diambil dalam mengurangkan kebergantungan industri ke atas tenaga kerja asing seperti berikut:

(i) menetapkan had penggajian pekerja asing di Malaysia tidak melebihi 15% daripada jumlah guna tenaga Negara pada tahun 2020 sepertimana yang digariskan dalam Rancangan Malaysia Ke-11;

(ii) majikan dikehendaki untuk mengiklankan kekosongan sesuatu jawatan dalam Portal *JobsMalaysia* bagi memastikan kekosongan jawatan ditawarkan kepada pencari kerja tempatan terlebih dahulu;

(iii) kolaborasi antara JTK dengan majikan melalui Program Penempatan Pekerjaan (3P) untuk penawaran peluang pekerjaan kepada pencari kerja tempatan;

(iv) memperkenalkan Sistem Latihan *Dual* Nasional untuk menyediakan tenaga kerja mahir negara melalui kaedah latihan industri yang komprehensif dan terkini bagi memastikan kemahiran tenaga kerja dipertingkatkan;

SOALAN NO : 19

(v) pembiayaan latihan di bawah Pembangunan Sumber Manusia Berhad melalui caruman levi majikan untuk melatih semula pekerja bagi meningkatkan kemahiran serta kepelbagaian kemahiran pekerja;

(vi) menggalakkan sektor-sektor berintensifkan buruh beralih kepada penggunaan mekanisasi dan automasi. Langkah ini dapat membantu negara mencapai sasaran melahirkan 35% pekerja mahir di Malaysia menjelang tahun 2020;

(i) menyediakan *exit policy* penggajian pekerja asing melalui pelaksanaan pelan latihan kemahiran kepada pekerja warganegara, memberi keutamaan kepada mekanisme *Industrialised Building System* (IBS) dalam sektor pembinaan, peralihan kepada intensif automasi dan mekanisasi, restoran berkonsepkan *self-service* dan sebagainya.

Tuan Yang di-Pertua,

3. Berhubung dengan pelan berhubung kawalan Pekerja asing tidak sah, perkara ini adalah di bawah bidang kuasa Kementerian Dalam Negeri.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATO' SERI DR. SHAHIDAN BIN
KASSIM [ARAU]**

TARIKH : 4 NOVEMBER 2019

SOALAN

Minta **MENTERI BELIA DAN SUKAN** menyatakan:

(a) Apakah tindakan serta langkah yang telah dilakukan oleh pihak kementerian dalam memastikan penyelenggaraannya kemudahan sukan di Perlis dapat diberi perhatian serta bercadang untuk menyerahkan penyelenggaraan kemudahan sukan ini untuk diuruskan kepada persatuan-persatuan sukan negeri; dan

(b) adakah pihak kerajaan sedar bahawa negeri Perlis pernah mengeluarkan atlet yang ternama di peringkat negara iaitu dua orang atlet para yang mendapat emas di sukan Olimpik adalah datangnya dari negeri Perlis. Apakah jasa mereka ini membolehkan pihak kementerian untuk menambah serta memberi kemudahan sukan terutamanya kepada atlet para ini serta apakah pihak kerajaan bercadang untuk membantu atlet para ini dari segi latihan dimana sekarang ini banyak bergantung kepada ihsan orang ramai.

JAWAPAN

Yang di-Pertua,

1. Kementerian Belia dan Sukan telah dan akan menyelenggara serta menaik taraf kemudahan-kemudahan di negeri Perlis secara berperingkat untuk memastikan ia dapat digunakan dengan selesa oleh semua lapisan masyarakat.
2. Untuk makluman Ahli Yang Berhormat, Kementerian ingin mengucapkan tahniah kepada Kerajaan Negeri Perlis atas jasa dan usaha yang telah diambil untuk melahirkan dua (2) jaguh Negara iaitu Abdul Latif Romly dan Mohamad Ridzuan Mohd Puzi dari sukan Olahraga Paralimpik. Kejayaan ini adalah hasil usahasama pelbagai pihak seperti Jabatan Belia Dan Sukan Negeri (JBSN), Bahagian Pendidikan Khas, Jabatan Pendidikan Negeri, Jabatan Kebajikan Masyarakat serta Persatuan Sukan Orang Kurang Upaya (PESRON) turut membantu dalam mengenal pasti atlet berpotensi untuk dilatih diperingkat kebangsaan dan seterusnya ke peringkat antarabangsa. Atlet-atlet ini mengguna pakai kemudahan-kemudahan yang sedia ada di bawah penyeliaan Majlis Sukan Negeri dan JBSN.
3. Dari segi pelaksanaan program pula, Kementerian melalui MSN telah melantik Jurulatih Separuh Masa iaitu Encik Affizam Amdan untuk program Pelapis Atlet Para Negeri Perlis bagi sukan olahraga. Selain itu, bagi latihan asas seperti *mini hurdle*, peluru, lembing dan cakera turut diberikan untuk digunakan ketika sesi latihan.
4. MSN turut membantu atlet pelapis negeri dalam penyertaan ke sirkit kebangsaan yang dilaksanakan empat (4) kali setahun dengan memberikan perbelanjaan sajian, penginapan dan tambang perjalanan.
5. Manakala di peringkat antarabangsa pula, bantuan kewangan juga diberikan bagi pendaftaran penyertaan *lesen International Paralympic Committee* (IPC) (15 *Euro*/atlet) dan untuk empat (4) orang atlet para

negeri yang telah menyertai *7th China Open Athletics Championships* yang berlangsung pada 6 hingga 13 Mei 2019.

6. Di samping itu, atlet kelahiran Perlis, Mohamad Erwan Mohd Hasnor (T37) juga diberikan elaun separuh masa berjumlah RM500 sebulan berdasarkan pencapaian cemerlangnya di Temasya Para Asean di Kuala Lumpur 2017.

7. Selain sukan olahraga para, sukan *powerlifting* juga diberikan bantuan kewangan oleh MSN dengan pemberian elaun sebanyak RM350 sebulan kepada seorang penggerak sukan dan penyertaan ke sirkit kejohanan. Malah, bantuan peralatan asas latihan turut disediakan di Gym latihan Majlis Sukan Negeri Perlis.

8. Atlet-atlet Pelapis Para yang mempamerkan prestasi cemerlang diberikan peluang untuk mewakili negara ke Temasya Para Asean yang dianjurkan setiap 2 tahun sekali. Pemenang pingat emas pertama juga di temasya ini akan diberikan insentif berjumlah RM20,000.

9. Pihak kementerian juga sememangnya berhasrat untuk menyerahkan penyelenggaraan kemudahan sukan yang telah dibina kepada persatuan-persatuan sukan negeri namun begitu ia tertakluk kepada kemampuan kewangan dan teknikal yang dimiliki oleh persatuan tersebut.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

DARIPADA : YB TUAN HAJI AHMAD BIN HASSAN [PAPAR]

TARIKH : 4 NOVEMBER 2019 (ISNIN)

SOALAN

Minta **MENTERI BELIA DAN SUKAN** menyatakan status pelaksanaan proses pembinaan mini Stadium di Kg Beringgis, Papar yang sudah diluluskan dalam RMK-11 sebanyak RM10 juta untuk kemudahan sekolah-sekolah dan penduduk umum di daerah Papar.

JAWAPAN

Yang di-Pertua,

1. Cadangan pembinaan Kompleks Sukan Papar dibatalkan kerana tapak projek tidak sesuai dan memerlukan kos yang tinggi untuk kerja-kerja tanah.
2. KBS sedia menimbang semula cadangan pembinaan projek ini di dalam Rancangan Malaysia Ke Dua Belas dengan tapak baharu yang lebih sesuai.
3. Untuk makluman Ahli Yang Berhormat jua, setakat ini terdapat dua puluh tujuh (27) kemudahan sukan di Daerah Papar yang terdiri daripada padang bola sepak, dewan serbaguna, gelanggang sepak takraw, gelanggang bola tampar dan gelanggang futsal KBS. Sebanyak lapan belas (18) unit kemudahan tersebut adalah di bawah seliaan Kerajaan Negeri, swasta dan lain-lain, manakala sembilan (9) unit kemudahan sukan adalah di bawah seliaan KBS. Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

**DARIPADA : YB TUAN SHAHARIZUKIRNAIN BIN ABD.
KADIR [SETIU]**

TARIKH : 04 NOVEMBER 2019 (ISNIN)

SOALAN

Minta **MENTERI SUMBER MANUSIA** menyatakan sama ada paras gaji yang diterima pekerja di negara ini sepadan dengan beban dan produktiviti mereka serta menyatakan langkah-langkah yang dilaksanakan bagi memastikan ia seimbang.

JAWAPAN

Tuan Yang di-Pertua

1. Kementerian melalui Jabatan Perhubungan Perusahaan Malaysia sentiasa berusaha bagi memastikan wujudnya keseimbangan dan saling kaitan antara upah dan produktiviti yang dihasilkan. Langkah ini dilaksanakan melalui Sistem Upah Yang Dikaitkan Dengan Produktiviti (PLWS). PLWS mewujudkan hubungan saling melengkapi di antara upah dan produktiviti pekerja. Berdasarkan sistem ini, upah yang diperolehi akan meningkat seiring dengan produktiviti dan prestasi pekerja.

2. Melalui pelaksanaan dan pengamalan sistem ini, ia membolehkan pekerja-pekerja mendapat upah yang adil hasil daripada peningkatan produktiviti dan prestasi mereka. PLWS mempunyai dua (2) komponen iaitu Komponen Tetap dan Komponen Berubah. Komponen Tetap merangkumi gaji pokok, kenaikan gaji tahunan dan bonus kontraktual (jika berkaitan). Manakala Komponen Berubah merujuk kepada kenaikan gaji tahunan berdasarkan peningkatan produktiviti atau formula pengagihan keuntungan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN LARRY SOON @ LARRY SNG WEI SHIEN
[JULAU]**

TARIKH : 4 NOVEMBER 2019 (ISNIN)

SOALAN

Minta **MENTERI HAL EHWAL EKONOMI** menyatakan kesan positif yang dinikmati ekonomi negara dari segi penempatan semula perniagaan serta lencongan dagangan dan pelaburan akibat perang perdagangan di antara Amerika Syarikat dan China.

JAWAPAN

Tuan Yang Di Pertua,

1. Untuk makluman Ahli Yang Berhormat, pertumbuhan keluaran dalam negeri kasar (KDNK) bagi pertengahan tahun pertama 2019 menyederhana sedikit kepada 4.7% berbanding 4.9% pada tempoh yang sama tahun sebelumnya. Walau bagaimanapun, kadar pertumbuhan ini masih dalam lingkungan sasaran yang ditetapkan bagi tahun 2019, iaitu sebanyak 4.7%.
2. Antara sebab penyederhanaan ini adalah faktor luaran yang semakin mencabar memandangkan Malaysia sebuah ekonomi yang terbuka dan berdagang dengan pelbagai negara. Konflik perdagangan antara dua rakan dagang penting Malaysia iaitu Amerika Syarikat dan China telah menjejaskan pertumbuhan ekonomi dan perdagangan global, termasuk Malaysia. Di samping itu, negara juga berdepan dengan kelembapan pasaran barangan elektrik dan elektronik, ketidaktentuan dalam pasaran kewangan dan harga komoditi serta ketegangan geopolitik.
3. Sebagai sebuah negara yang mengamalkan ekonomi terbuka dengan jumlah dagangan sebanyak 130% kepada KDNK pada 2018, Kerajaan sentiasa peka dan mengambil langkah proaktif bagi memastikan momentum pertumbuhan ekonomi sentiasa meningkat. Tindakan Amerika Syarikat mengenakan tarif terhadap China telah mendorong pelabur-pelabur China mengalihkan perniagaan mereka ke Asia Tenggara. Peralihan pelaburan ini akan memberikan impak positif dengan mewujudkan peluang untuk Malaysia menjadi destinasi pilihan alternatif bagi pelaburan langsung asing (FDI).
4. Di samping itu, ketegangan perdagangan ini membuka ruang kepada Malaysia untuk meningkatkan eksport minyak sawit ke China sebagai barangan pengganti kepada minyak soya dan jagung. Pada Mac 2019, syarikat Malaysia telah berjaya menandatangani perjanjian bernilai hampir AS\$900 juta bagi membekalkan 1.62 juta tan minyak sawit ke China. Dalam tempoh Januari hingga Ogos 2019, eksport

minyak sawit Malaysia ke China telah meningkat kepada 1.4 juta tan dengan nilai eksport sebanyak RM3.1 bilion. Impak keseluruhan peralihan perdagangan dijangka meningkatkan KDNK negara sebanyak 0.1 mata peratusan.

5. Selain itu, konflik perdagangan yang berlarutan mewujudkan peluang untuk Malaysia menjadi destinasi pilihan utama bagi pelaburan langsung asing (FDI). Berdasarkan data yang diterbitkan oleh Lembaga Pembangunan Pelaburan Malaysia (MIDA), jumlah FDI yang diluluskan meningkat sebanyak 97% kepada RM49.5 bilion dalam tempoh separuh pertama tahun 2019, berbanding RM25.1 bilion yang dicatat dalam tempoh yang sama tahun 2018. FDI dalam sektor pembuatan daripada Amerika Syarikat mencatatkan nilai tertinggi sebanyak RM11.7 bilion, diikuti oleh China sebanyak RM4.8 bilion. Peningkatan pelaburan ini membuktikan keyakinan pelabur telah meningkat.

6. Di samping itu, seperti yang disarankan di bawah Wawasan Kemakmuran Bersama, Malaysia juga komited untuk meningkatkan inisiatif perdagangan dalam kalangan negara ASEAN yang mempunyai 600 juta penduduk. Dalam hal ini, usaha akan ditingkatkan ke arah menjadikan Malaysia sebagai Hub ASEAN. Sebanyak 12 aktiviti berpotensi telah dikenalpasti untuk dibangunkan sebagai Hub ASEAN di Malaysia, antaranya termasuk logistik, kewangan berteknologi dan kewangan Islam berteknologi, industri halal, perdagangan maritim, industri kandungan animasi dan digital serta pelancongan.

7. Kerajaan yakin usaha-usaha ini berupaya memastikan Malaysia kekal di landasan pertumbuhan ekonomi yang positif ke arah mencapai sasaran sebagai sebuah negara maju, inklusif dan berdaya tahan.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

**DARIPADA : YB DATO' SERI HAJI ABDUL HADI BIN
AWANG [MARANG]**

TARIKH : 04 NOVEMBER 2019 (ISNIN)

SOALAN

Minta **MENTERI SUMBER MANUSIA** menyatakan apakah pelan strategik Kerajaan untuk menyelesaikan peningkatan jumlah siswazah menganggur terutama daripada golongan B40 dan isu ketidaksepadanan pekerjaan dengan kelulusan.

JAWAPAN

Tuan Yang di-Pertua,

1. Berdasarkan kepada Laporan Penyiasatan Tenaga Buruh, Jabatan Perangkaan Malaysia (DOSM), kadar pengangguran pada Julai 2019 mencatatkan pada kadar 3.3 peratus berbanding 3.4 peratus dalam tempoh yang sama pada Julai 2018. Statistik mencatatkan seramai 624,800 orang penganggur pada Julai 2019 berbanding seramai 510,800 orang pada tempoh yang sama 2018. Bilangan tenaga buruh bekerja pada bulan Julai 2019 mencatatkan seramai 15.2 juta orang berbanding seramai 14.9 juta orang pada tempoh yang sama 2018.
2. Ketidakpadanan penawaran berbanding permintaan dalam pasaran pekerjaan yang mana ia membawa kepada peningkatan pengangguran golongan graduan dan belia berikutan pekerjaan yang

SOALAN NO : 24

ditawarkan yang selaras dengan perkembangan industri 4.0. Dalam hal ini, KSM dan Kementerian Pendidikan Malaysia (KPM) telah diberikan peranan sebagai Pengerusi Bersama bagi menerajui Jawatankuasa Kerja Pembangunan Kemahiran dan bakat (*Technical Working Group-Skills*) yang diterajui oleh Kementerian Perdagangan Antarabangsa dan Industri (MITI)

3. Kementerian juga telah mempertingkatkan usaha kolaborasi industri dalam pendidikan dan latihan dalam pembangunan tenaga kerja untuk memenuhi keperluan industri kini dan akan datang. Usaha ke arah menawarkan latihan berkualiti tinggi dan menggalakkan pembangunan tenaga kerja melalui pembangunan kurikulum dan latihan *Techical and Vocational Education Training* (TVET) bagi memenuhi keperluan kemahiran industri. Jawatankuasa Industri dan Kemahiran menjadi platform rasmi bagi menambah peluang pekerjaan dan memperbaiki padanan pekerja dengan pekerjaan. Langkah-langkah intervensi seperti mengenal pasti kemahiran yang diperlukan industri, serta mengurus perdana pendidikan serta Latihan Teknikal dan Vokasional (TVET) melalui pembangunan *National Occupational Skills Standard* (NOSS) selaras industri 4.0.

4. Di samping itu, Jabatan Tenaga Manusia (JTM) mengambil inisiatif menubuhkan *Institute-Industry Management Board* (IIMB) bermula pada tahun 2019, di mana IIMB ini merupakan satu platform yang akan melibatkan pihak industri di dalam merancang program, kurikulum dan keperluan infrastruktur latihan di Institut Latihan JTM (ILJTM) agar ianya selari dengan kehendak pasaran kerja semasa. Penubuhan IIMB ini amat penting untuk memastikan kursus-kursus yang ditawarkan di ILJTM adalah relevan dengan teknologi terkini khususnya elemen-elemen yang berkaitan dengan keperluan Industri 4.0, dan pada masa yang sama dapat mengatasi masalah ketidaksepadanan (*mismatch*) yang sering dibangkitkan oleh pihak industri.

SOALAN NO : 24

5. Kerajaan juga melalui Pelan Pembangunan Pendidikan Malaysia (2015-2025), telah menggariskan strategi untuk mentransformasi sistem pendidikan negara, memperkasa institusi pengajian bertanggungjawab untuk melahirkan siswazah yang cekap teknologi serta menambah baik kualiti pendidikan TVET negara agar kadar penyertaan graduan dan belia ke dalam pasaran perburuhan selaras kehendak industri.

6. Kementerian ini juga membangunkan modul latihan melalui Pembangunan Sumber Manusia Berhad (PSMB) melalui kerjasama dengan pelbagai institut latihan awam dan swasta bagi menyediakan program *upskilling* dan *reskilling* bagi meningkatkan perubahan keperluan kerja masa hadapan (*future work*). Kementerian juga mempromosikan 59 pekerjaan yang iaitu *Critical Occupational list (COL)* yang melibatkan 18 sektor ekonomi oleh Talent Corporation Dan Institut Maklumat dan Analisis Pasaran Buruh (ILMIA) yang diperlukan oleh industri semasa sebagai rujukan kepada penyedia-penyedia latihan sebagaimana permintaan di bawah revolusi industri 4.0.

7. Kementerian juga sedang menggubal *National Human Resource Blueprint* selaras dengan 7 Pelan Strategik Wawasan Kemakmuran Bersama 2021-2030. Strategi transformasi modal insan harus memfokuskan kepada penyediaan sumber tenaga yang lebih produktif, efektif, berkemahiran, berteknologi dan bernilai tinggi, termasuk dalam industri ekonomi baharu seiring dengan pengumuman oleh YAB Perdana Menteri pada 5 Oktober 2019.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : PUAN JUNE LEOW HSIAD HUI
(HULU SELANGOR)**

TARIKH : 4 NOVEMBER 2019 (ISNIN)

SOALAN

minta **PERDANA MENTERI** menyatakan usaha-usaha Kerajaan bagi menangani ucapan kebencian kaum dan agama yang mengancam keharmonian dan perpaduan kaum khususnya ahli-ahli politik dan pemimpin negara yang membuat kenyataan berunsur perkauman dan agama.

**JAWAPAN : YB SENATOR TUAN WAYTHA MOORTHY A/L
PONNUSAMY, MENTERI DI JABATAN PERDANA
MENTERI (PERPADUAN NEGARA DAN
KESEJAHTERAAN SOSIAL)**

Yang di-Pertua,

Kerajaan di bawah kepimpinan YAB Tun Dr. Mahathir Mohamad, Perdana Menteri Malaysia, sentiasa peka dan sensitif terhadap isu-isu yang menyentuh kaum dan agama dan akan sentiasa memastikan keharmonian terus terpelihara melalui langkah-langkah berikut:

- (i) mengingatkan pemimpin parti politik supaya menjaga sensitiviti kaum dan agama dan tidak membuat teguran secara terbuka. Setiap kenyataan yang dikeluarkan tidak sepatutnya menyakitkan hati mana-mana kumpulan kaum dan penganut agama.

- (ii) menyampaikan mesej kepada pemimpin-pemimpin parti-parti politik supaya mengingatkan dan memberikan kesedaran kepada ahli-ahli parti agar sentiasa mengukuhkan perpaduan, terutama dalam persekitaran domestik dan luaran yang amat mencabar pada masa ini.
- (iii) menghormati antara satu sama lain apabila memberi sebarang pendapat dan pandangan dan tidak melampaui batasan dengan menggunakan bahasa yang kesat ketika menyentuh isu kaum dan agama. Walaupun wujud ideologi politik dan pandangan yang berbeza, masing-masing perlu kekal menghormati dan menghargai satu sama lain seperti kebiasaan dan meneutralkan politik kebencian.
- (iv) Melalui tindakan mahkamah dimana ahli politik yang sengaja menimbulkan sensitiviti kaum dan agama sehingga menimbulkan kebencian, kebimbangan dan kegusaran rakyat akan didakwa di mahkamah di bawah undang-undang yang sedang berkuat kuasa. Antaranya Akta Hasutan 1948 [Akta 15], Kanun Keseksaan [Akta 574] dan Akta Komunikasi dan Multimedia 1998 [Akta 588] digunakan untuk mengambil tindakan ke atas pihak yang didapati telah membangkitkan isu-isu sensitif melibatkan agama, kaum dan Institusi Diraja.
- (v) cadangan penubuhan Suruhanjaya Keharmonian dan Rekonsiliasi Nasional iaitu suatu suruhanjaya bebas bagi menangani isu-isu perkauman dan agama sedang dipertimbangkan oleh Kerajaan melalui RUU Suruhanjaya Keharmonian dan Rekonsiliasi Nasional (*National Harmony and Reconciliation Commission Bill*). PERPADUAN telah membuat beberapa pindaan terhadap draf sedia ada yang telah disediakan oleh MKPN pada tahun 2014 dan kini sedang mengkaji kewujudan model lain-lain suruhanjaya serta skop bidang kuasanya di beberapa negara luar untuk melihat kesesuaiannya di Malaysia. Dengan adanya suruhanjaya ini kelak, usaha-usaha yang lebih konkrit, holistik dan secara bersepadu dapat dilaksanakan bagi membina bangsa Malaysia yang lebih bersatu padu, adil dan saksama tanpa sebarang diskriminasi dan jenayah kebencian sebagaimana yang dihasratkan oleh barisan

pemimpin dan rakyat negara ini demi memelihara keamanan negara dan keharmonian masyarakat.

Kerajaan yakin dan percaya bahawa proses membina negara dan memupuk perpaduan nasional ke arah keharmonian negara sememangnya merupakan satu perjuangan berterusan yang memerlukan usaha-usaha dinamik bagi membuka minda dan sikap rakyat untuk meraikan dan menghargai kepelbagaian yang wujud. Usaha memupuk persefahaman dan perpaduan dalam kepelbagaian (*unity in diversity*) ini memerlukan penyertaan dan sumbangan dari semua pihak, terutamanya ahli-ahli politik, aktivis-aktivis masyarakat, pemimpin-pemimpin masyarakat, badan bukan kerajaan (NGO) dan sektor swasta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS (2019)**

PERTANYAAN : LISAN

**DARIPADA : YB DATO' HAJI CHE ABDULLAH BIN MAT
NAWI [TUMPAT]**

TARIKH : 4 NOVEMBER 2019 (ISNIN)

SOALAN

Minta **PERDANA MENTERI** menyatakan sejauh mana kepakaran yang dimiliki Dr. Zakir Naik dalam bidang perbandingan agama dapat dikembangkan bagi menyuburkan dakwah Islam di Malaysia.

**JAWAPAN : (YB DATUK SERI DR. MUJAHID BIN YUSOF,
MENTERI DI JABATAN PERDANA MENTERI)**

Tuan Yang di-Pertua,

1. Untuk makluman Ahli Yang Berhormat, Kerajaan sentiasa terbuka dan mengalu-alukan mana-mana ilmuan Islam yang ingin menyumbang kepakaran mereka bagi menyuburkan aktiviti dakwah dan budaya ilmu di negara ini. Walau bagaimanapun, para pendakwah tempatan atau daripada luar negara yang berhasrat untuk mengajar atau berceramah di negara ini adalah tertakluk kepada undang-undang dan peraturan yang telah ditetapkan oleh pihak berkuasa termasuk mematuhi syarat supaya mendapatkan tauliah terlebih dahulu daripada pihak berkuasa agama di negeri-negeri.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : YB DATUK DR. HASAN BIN BAHROM [TAMPIN]

TARIKH : 04 NOVEMBER 2019

SOALAN

Minta **MENTERI SUMBER MANUSIA** menyatakan bagaimanakah usaha Kerajaan untuk meyakinkan rakyat bahawa anak-anak yang menyertai bidang TVET ini juga turut mempunyai peluang untuk melanjutkan pelajaran ke peringkat yang lebih tinggi bukan sahaja di dalam negara, bahkan sehingga ke luar negara. Apakah tindakan proaktif Kerajaan dalam memastikan bidang ini mendapat laluan kerja yang lebih cerah.

JAWAPAN

Tuan Yang di-Pertua,

1. Program-program TVET sedia ada sedang dinilai semula mengikut keperluan sektor ekonomi untuk meningkatkan kebolehpasaran pekerjaan di kalangan lepasan TVET dengan laluan kerjaya yang lebih cerah. Bagi menarik lebih ramai golongan muda menyertai aliran TVET, Kerajaan akan memastikan laluan pendidikan lanjutan bagi graduan TVET untuk melanjutkan pelajaran ke peringkat yang lebih tinggi dapat direalisasikan melalui sistem akreditasi dan artikulasi yang lebih baik.
2. Pembangunan Sistem Jaminan Kualiti Tunggal TVET seperti yang digariskan oleh Rancangan Malaysia Kesebelas (RMKe-11)

SOALAN NO : 27

akan memperkukuh tadbir urus TVET untuk pengurusan yang lebih baik. Sektor TVET akan diperkukuh melalui penubuhan sistem tunggal yang akan diguna pakai oleh Agensi Kelayakan Malaysia (MQA) dan Jabatan Pembangunan Kemahiran (JPK) bagi tujuan penyelarasan dan pemantauan TVET yang lebih baik. Sistem baharu ini akan bertanggungjawab mengakreditasi program TVET yang ditawarkan oleh institusi-institusi TVET awam dan swasta berdasarkan Kerangka Kelayakan Malaysia (*Malaysian Qualifications Framework*, MQF) Edisi Kedua. Pelaksanaan jaminan kualiti program-program TVET oleh MQA dan JPK akan dibuat berdasarkan dokumen *Code of Practice for TVET Programme Accreditation* yang telah selesai dibangunkan.

3. Strategi ini akan membolehkan mobiliti pelajar antara semua institusi TVET, membuka peluang kerjaya graduan TVET supaya lebih kompetitif dan memperluas peluang pembelajaran sepanjang hayat. Pelaksanaan Sistem Jaminan Kualiti Tunggal TVET telah dipersetujui oleh Jemaah Menteri pada 30 Januari 2019. Usaha tersebut adalah di antara tindakan proaktif Kerajaan bagi membuka peluang kepada pelajar TVET untuk menyambung pelajaran ke peringkat yang lebih tinggi.

4. Pelbagai langkah proaktif Kerajaan dalam memastikan bidang TVET mendapat laluan kerjaya yang lebih cerah melalui:

- (i) memperkemaskan dan memperluaskan program perantisan dan latihan industri yang bertujuan meningkatkan tahap kebolehpasaran belia khususnya graduan melalui latihan *soft-skills* dan *on-the-job training*. Program-program seperti ini telah menunjukkan kejayaan di mana lebih 90 peratus belia yang mengikuti program tersebut berjaya mendapat pekerjaan;

SOALAN NO : 27

- (ii) kepelbagaian peluang kerjaya tidak terhad untuk graduan TVET bekerja makan gaji semata-mata, malahan lulusan TVET juga boleh menceburi bidang keusahawanan yang turut dikenali sebagai *digital technopreneur*, iaitu usahawan dalam bidang teknikal. Bidang keusahawanan terutamanya dalam bidang perkhidmatan, pelancongan dan pertanian moden juga mewujudkan peluang-peluang pekerjaan kepada rakyat tempatan; dan
 - (iii) bagi memastikan pertumbuhan mampan dan inklusif dalam pasaran buruh negara, Kerajaan berhasrat menambah baik kerjaya graduan TVET dengan pengiktirafan profesional teknologis melalui Lembaga Teknologis Malaysia (MBOT). MBOT berperanan sebagai badan berkanun yang mengawal, menggalakkan dan membangunkan profesion teknologis di Malaysia. Dengan pengiktirafan profesional daripada MBOT kepada graduan TVET akan mengukuhkan jaminan dan keyakinan umum terhadap TVET sebagai kerjaya pilihan.
5. Semua usaha dan strategi tersebut adalah di antara tindakan berterusan Kerajaan bagi memastikan kepentingan semua golongan masyarakat yang cenderung kepada bidang teknikal terpelihara sekaligus menambahbaikkan taraf kehidupan mereka.

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

**DARIPADA : YB DATO' SERI RICHARD RIOT ANAK
JAEM [SERIAN]**

TARIKH : 04 NOVEMBER 2019 (ISNIN)

SOALAN

Minta **MENTERI SUMBER MANUSIA** menyatakan bilakah Projek Pembinaan Institut Latihan Perindustrian (ILP) Serian, Sarawak dijangka siap.

JAWAPAN

Tuan Yang di-Pertua,

Projek penubuhan Institut Latihan Perindustrian (ILP) Serian, Sarawak kini sedang dalam tempoh pembinaan dan dijangka siap pada 14 Disember 2021.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATO' SRI DR. SANTHARA
[SEGAMAT]**

TARIKH : 4 NOVEMBER 2019 (ISNIN)

SOALAN NO. 29

Minta **MENTERI BELIA DAN SUKAN** menyatakan mengenai arah tuju permainan catur dan penglibatan Kementerian dalam memajukan permainan catur. Apakah fokus dan bajet bagi aktiviti yang dikenal pasti ini.

JAWAPAN

Yang di-Pertua,

1. Untuk makluman Ahli Yang Berhormat, Untuk makluman Ahli Yang Berhormat, Kementerian melalui Majlis Sukan Negara (MSN) memberikan penumpuan utama ke atas 16 jenis Sukan Teras dalam pelaksanaan pembangunan sukan berprestasi tinggi negara bagi persediaan kontinjen negara ke arah penyertaan di temasya sukan utama melibatkan Sukan SEA, Sukan Asia, Sukan Komanwel mahupun Sukan Olimpik.

2. Sukan catur tidak termasuk di dalam senarai 16 jenis sukan teras. Sukan ini juga tidak dipertandingkan secara konsisten di temasya-temasya utama di antara tempoh tahun 2012 hingga 2018 lalu. Berdasarkan sejarah penyenaraian jenis sukan di temasya utama, catur hanya dipertandingkan di Sukan Asia Guangzhou 2010 dan Sukan SEA Palembang 2011 sahaja. Di Guangzhou 2010, kontinjen negara menerusi tiga (3) atlet telah

menyertai dua (2) acara yang dipertandingkan iaitu *Men's* dan *Women's Individual Rapid* dengan meraih kedudukan ke 22, 29 dan 38 sahaja. Manakala penyertaan di Palembang 2011, pasukan catur hanya meraih satu (1) pingat gangsa menerusi acara *Mixed Double Standard Class*. Bagi temasya Sukan SEA Filipina yang akan membuka tirainya pada 30 November 2019, pihak penganjur telah menyenaraikan sebanyak lima (5) acara bagi sukan catur ini.

3. Prestasi atlet sukan catur di Sukan SEA Filipina nanti boleh dijadikan sebagai asas penilaian prestasi mereka sebelum sasaran yang lebih tinggi ditetapkan. Pihak Kementerian melalui MSN bersedia untuk mempertimbangkan bantuan kewangan kepada Persekutuan Catur Malaysia sekiranya pasukan catur Malaysia mempamerkan prestasi yang cemerlang di Filipina serta perancangan-perancangan yang telah dibuat oleh pihak persatuan.

4. KBS melalui MSN amat menggalakkan Persatuan-Persatuan Sukan Kebangsaan untuk membangunkan sukan mereka dari peringkat akar umbi sehinggalah ke peringkat yang lebih tinggi. Pihak kerajaan juga bersedia untuk mempertimbangkan bentuk bantuan kewangan bagi persatuan-persatuan sukan yang tidak disenaraikan di bawah 16 jenis Sukan Teras termasuk sukan catur ini berdasarkan keperluan temasya serta kedudukan kewangan semasa.

5. Persatuan Sukan juga sering kali disyorkan untuk menerokai peluang-peluang bagi mendapatkan tajaan daripada badan-badan korporat serta syarikat swasta bagi mengelakkan kebergantungan sepenuhnya terhadap kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJI FADILLAH BIN YUSOF
[PETRAJAYA]**

TARIKH : 4 NOVEMBER 2019 (ISNIN)

SOALAN

Minta **MENTERI HAL EHWAL EKONOMI** menyatakan kesan yang dialami oleh ekonomi negara akibat dari perang perdagangan antara China dan Amerika dan apakah langkah yang telah diambil bagi mengurangkan kesan negatif dari situasi ini.

JAWAPAN

Tuan Yang Di Pertua,

1. Untuk makluman Ahli Yang Berhormat, pertumbuhan keluaran dalam negeri kasar (KDNK) bagi pertengahan tahun pertama 2019 menyederhana sedikit kepada 4.7% berbanding 4.9% pada tempoh yang sama tahun sebelumnya. Walau bagaimanapun, kadar pertumbuhan ini masih dalam lingkungan sasaran yang ditetapkan bagi tahun 2019, iaitu sebanyak 4.7%.
2. Antara sebab penyederhanaan ini adalah faktor luaran yang semakin mencabar memandangkan Malaysia sebuah ekonomi yang terbuka dan berdagang dengan pelbagai negara. Konflik perdagangan antara dua rakan dagang penting Malaysia iaitu Amerika Syarikat dan China telah menjejaskan pertumbuhan ekonomi dan perdagangan global, termasuk Malaysia. Di samping itu, negara juga berdepan dengan kelembapan pasaran barangan elektrik dan elektronik, ketidaktentuan dalam pasaran kewangan dan harga komoditi serta ketegangan geopolitik.
3. Sebagai sebuah negara yang mengamalkan ekonomi terbuka dengan jumlah dagangan sebanyak 130% kepada KDNK pada 2018, Kerajaan sentiasa peka dan mengambil langkah proaktif bagi memastikan momentum pertumbuhan ekonomi sentiasa meningkat. Tindakan Amerika Syarikat mengenakan tarif terhadap China telah mendorong pelabur-pelabur China mengalihkan perniagaan mereka ke Asia Tenggara. Peralihan pelaburan ini akan memberikan impak positif dengan mewujudkan peluang untuk Malaysia menjadi destinasi pilihan alternatif bagi pelaburan langsung asing (FDI).
4. Di samping itu, ketegangan perdagangan ini membuka ruang kepada Malaysia untuk meningkatkan eksport minyak sawit ke China sebagai barangan pengganti kepada minyak soya dan jagung. Pada Mac 2019, syarikat Malaysia telah berjaya menandatangani perjanjian bernilai hampir AS\$900 juta bagi membekalkan 1.62 juta tan minyak sawit ke China. Dalam tempoh Januari hingga Ogos 2019, eksport

minyak sawit Malaysia ke China telah meningkat kepada 1.4 juta tan dengan nilai eksport sebanyak RM3.1 bilion. Impak keseluruhan peralihan perdagangan dijangka meningkatkan KDNK negara sebanyak 0.1 mata peratusan.

5. Selain itu, konflik perdagangan yang berlarutan mewujudkan peluang untuk Malaysia menjadi destinasi pilihan utama bagi pelaburan langsung asing (FDI). Berdasarkan data yang diterbitkan oleh Lembaga Pembangunan Pelaburan Malaysia (MIDA), jumlah FDI yang diluluskan meningkat sebanyak 97% kepada RM49.5 bilion dalam tempoh separuh pertama tahun 2019, berbanding RM25.1 bilion yang dicatat dalam tempoh yang sama tahun 2018. FDI dalam sektor pembuatan daripada Amerika Syarikat mencatatkan nilai tertinggi sebanyak RM11.7 bilion, diikuti oleh China sebanyak RM4.8 bilion. Peningkatan pelaburan ini membuktikan keyakinan pelabur telah meningkat.

6. Di samping itu, seperti yang disarankan di bawah Wawasan Kemakmuran Bersama, Malaysia juga komited untuk meningkatkan inisiatif perdagangan dalam kalangan negara ASEAN yang mempunyai 600 juta penduduk. Dalam hal ini, usaha akan ditingkatkan ke arah menjadikan Malaysia sebagai Hub ASEAN. Sebanyak 12 aktiviti berpotensi telah dikenalpasti untuk dibangunkan sebagai Hub ASEAN di Malaysia, antaranya termasuk logistik, kewangan berteknologi dan kewangan Islam berteknologi, industri halal, perdagangan maritim, industri kandungan animasi dan digital serta pelancongan.

7. Usaha bersepadu ini akan meningkatkan produktiviti dan daya saing serta memastikan Malaysia kekal di landasan pertumbuhan ekonomi ke arah mencapai sasaran sebagai sebuah negara maju dan inklusif.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : YB TUAN RAMKARPAL SINGH A/L
KARPAL SINGH [BUKIT GELUGOR]

TARIKH : 04 NOVEMBER 2019

SOALAN

Minta **MENTERI SUMBER MANUSIA** menyatakan langkah-langkah yang telah diambil oleh Kerajaan untuk meningkatkan peluang pekerjaan dalam kalangan rakyat Malaysia.

JAWAPAN

Tuan Yang di-Pertua,

1. Pelbagai usaha dilaksanakan oleh Kementerian Sumber Manusia (KSM) dalam memperkukuh kompetensi sumber manusia bagi mengenal pasti pekerjaan yang telah di ambil untuk meningkatkan peluang pekerjaan di kalangan warganegara. Langkah-langkah yang diambil oleh KSM adalah seperti berikut:

- (i) menyediakan program *upskilling* dan *reskilling* kepada golongan pekerja bagi mempertingkatkan kemajuan sendiri dalam menyesuaikan diri dengan perubahan keperluan kerja masa hadapan (*future jobs*) serta persekitaran global yang semakin kompetitif dan dinamik;
- (ii) Jabatan Pembangunan Kemahiran (JPK) telah membangunkan *National Occupational Skills Standard* (NOSS) bagi 21 sektor ekonomi yang mana telah menjadi rujukan dalam pembangunan program latihan di institusi-institusi latihan awam dan swasta mengikut tahap kemahiran yang diperlukan. NOSS yang dibangunkan dan dipantau secara bersama dengan *Industry Lead Body* (ILB) adalah mengikut keperluan industri dan teknologi terkini;
- (iii) merangka satu kajian berkaitan Pelan Induk TVET yang merangkumi keperluan TVET bagi menghadapi Industri 4.0. Dalam usaha untuk memperkasa kualiti dan penyampaian TVET selari dengan Industri 4.0, kajian ini akan menyentuh aspek penstrukturan semula kurikulum, menaik taraf fasiliti dan kemudahan latihan, pembangunan profesional tenaga pengajar serta perkara-perkara lain yang berkaitan;
- (iv) mengadakan sesi libat urus dengan pihak industri bersama jabatan/agensi terlibat bagi memberi gambaran jelas berkaitan Industri 4.0. Maklumat hasil perkongsian daripada sesi ini akan seterusnya digunakan untuk mengkaji dan meneliti keperluan

SOALAN NO : 31

tenaga kerja bagi menghadapi Industri 4.0 seterusnya mewujudkan peluang pekerjaan baharu;

- (v) Kerajaan juga melalui Pelan Pembangunan Pendidikan Malaysia (2015-2025), telah menggariskan strategi untuk mentransformasikan sistem pendidikan negara, memperkasa institusi pengajian bertanggungjawab untuk melahirkan siswazah yang cekap teknologi serta menambah baik kualiti pendidikan TVET negara agar kadar penyertaan graduan dan belia ke dalam pasaran perburuhan selaras kehendak industri;
- (vi) KSM dan Kementerian Pendidikan Malaysia (KPM) telah diberikan peranan sebagai Pengerusi bersama bagi menerajui Jawatankuasa *Talent and Human Capital Development* bagi Industri 4.0. Jawatankuasa ini berperanan mengenal pasti keperluan pasaran buruh dan kemahiran yang diperlukan serta menyelaraskan dan melaksanakan usaha-usaha dalam memperkukuhkan kompetensi sumber manusia bagi menghadapi Industri 4.0;
- (vii) Kementerian juga mempromosikan 59 pekerjaan yang iaitu *Critical Occupational list (COL)* yang melibatkan 18 sektor ekonomi oleh *Talent Corporation* Dan Institut Maklumat dan Analisis Pasaran Buruh (ILMIA) yang diperlukan oleh industri semasa sebagai rujukan kepada penyedia-penyedia latihan sebagaimana permintaan di bawah revolusi industri 4.0.

2. Berdasarkan statistik daripada Portal pekerjaan sehingga Ogos 2019, kekosongan pekerjaan yang didaftarkan oleh majikan-majikan bagi kategori siswazah adalah sebanyak 50,326 jawatan manakala sebanyak 642,979 kekosongan jawatan adalah untuk kategori bukan siswazah. Pengiklanan oleh lebih 20,000 majikan aktif yang menawarkan pelbagai jawatan di semua kategori pekerjaan sektor awam dan swasta. Portal *JobsMalaysia* (JMC) di bawah kementerian merupakan portal rasmi pasaran pekerja untuk pencarian dan

SOALAN NO : 31

penawaran pekerjaan melalui sistem padanan kerja secara *web based*. Setiap pencari kerja berpeluang mendapatkan pekerjaan dan majikan pula berpeluang untuk mendapatkan calon yang sesuai. Pusat *JobsMalaysia* (JMC) di seluruh negara menawarkan pelbagai informasi kekosongan pekerjaan dan perkhidmatan khidmat nasihat pekerjaan kepada pencari kerja. Majikan dan pencari kerja juga berpeluang untuk menyertai karnival pekerjaan di seluruh negara termasuk program-program temuduga terbuka yang diadakan di semua *Urban Transformation Center (UTC)* di seluruh negara sepanjang tahun

3. Kerajaan pada masa ini mempergiatkan usaha-usaha kepada pengukuhan ekonomi domestik seperti meneruskan projek-projek mega seperti *The East Coast Rail Link (ECRL)*, pelaburan domestik serta lebih banyak *Foreign Direct Investment (FDI)* yang menyumbang penghasilan *high value jobs* dan *knowledge worker* berpendapatan tinggi yang berterusan dalam jangka panjang agar merangsang pertumbuhan ekonomi negara seterusnya untuk mewujudkan peluang-peluang pekerjaan baru (*new jobs creation*) dalam negara di pelbagai sektor ekonomi berpendapatan tinggi yang perlu dimanfaatkan oleh warganegara.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATUK HALIMAH BINTI MOHAMED SADIQUE
[KOTA TINGGI]**

TARIKH : 4 NOVEMBER 2019 (ISNIN)

SOALAN

DATUK HALIMAH BINTI MOHAMED SADIQUE [KOTA TINGGI] minta **MENTERI WILAYAH PERSEKUTUAN** menyatakan bilakah Pelan Pembangunan Kampung Baru dapat dibentangkan yang mana sepatutnya ia dibentangkan sekitar bulan Julai 2019 yang lepas.

JAWAPAN

Tuan Yang Di Pertua

Untuk makluman Yang Berhormat Kota Tinggi, pihak Kementerian Wilayah Persekutuan (KWP) melalui Dewan Bandaraya Kuala Lumpur (DBKL) dan Perbadanan Pembangunan Kampong Bahru (PKB) telah menyediakan cadangan pelan pembangunan semula Kampong Bharu yang dikenali sebagai Pelan Konsep Kampong Bharu (*'Kampong Bharu Concept Plan'* - KBCP) 2019. Ia telah dipamerkan kepada pemilik, pewaris dan orang awam pada 21 September 2019 sempena Sesi *'Town Hall'* bersama pemilik dan pewaris tanah berdaftar Kampong Bharu.

Pelan konsep yang disediakan ini adalah selaras dengan hala tuju baru Kementerian supaya Kerajaan terlibat secara langsung dalam pembangunan semula Kampong Bharu. Pelan konsep ini dirancang

sebagai satu pakej pembangunan bagi memastikan penyediaan kemudahan awam dan infrastruktur yang lengkap serta menyeluruh bagi menampung keperluan masa hadapan disamping bagi memastikan pemeliharaan dan pemuliharaan warisan Melayu Kampong Bharu.

Pelan Konsep yang disediakan ini adalah selaras dengan Pelan Bandar Raya Kuala Lumpur (PBRKL) 2020 yang diwartakan yang menetapkan zon guna tanah Perdagangan Pusat Bandar Raya (*City Centre Commercial* – CCC) dengan nisbah plot 1 nisbah 10 (1:10). Pelan yang disediakan ini menfokuskan kepada kawasan '*Malay Agriculture Settlement*' (M.A.S), Kampong Bharu seluas 220 ekar. 153.46 ekar adalah tanah milik yang akan dibeli dan dibangunkan. Pelan konsep ini telah menetapkan 5 prinsip dengan asas utama iaitu pemilikan tanah Kampong Bharu kekal menjadi milik orang Melayu. Prinsip yang digariskan adalah seperti mana berikut :

- 1) Menyediakan 1 **pelan yang berdaya maju** serta mampu menarik minat pelabur, pembeli dan penyewa melibatkan diri dalam pembangunan semula Kampong Bharu;
- 2) Memastikan **penyediaan ruang-ruang awam mencukupi** seperti kawasan lapang, riadah dan kemudahan masyarakat dalam menampung keperluan penduduk di masa akan datang;
- 3) Memastikan **penyediaan jaringan infrastruktur dan memenuhi keperluan utiliti** yang mampu menampung pertambahan penduduk, pekerjaan, dan isipadu trafik yang lebih tinggi pada masa hadapan;
- 4) Memastikan **elemen warisan, seni bina, budaya dan cara hidup** orang Melayu terus **dipelihara** dan **dipulihara** melalui penyediaan Taman Warisan Melayu disamping penerapan elemen Senibina Melayu Islam dalam pembangunan semula yang akan dilaksanakan; dan

- 5) Memastikan **lebih ramai** orang Melayu akan berpeluang memiliki hartanah dan menjalankan perniagaan di Pusat Bandar Raya melalui penyediaan lebih banyak unit kediaman dan ruang komersial.

Tuan Yang Di Pertua dan Ahli-Ahli Yang Berhormat,

Pelan konsep ini juga telah menetapkan sasaran pembinaan sejumlah 45,000 unit kediaman dari pelbagai jenis berbanding 4,500 unit kediaman pada masa kini. Sejumlah **50%** daripada jumlah tersebut telah ditetapkan bagi tujuan '**Kediaman Mampu Milik**'.

Selain itu juga, dianggarkan sebanyak 9 juta kaki persegi ruang lantai perniagaan akan disediakan berbanding 1 juta kaki persegi ruang perniagaan pada masa kini dan sebahagian telah diperuntukkan untuk '**Komersial Mampu Milik**'.

Pelan konsep yang disediakan ini akan diperincikan setelah mendapat pandangan serta persetujuan pemilik dan pewaris tanah berhubung tawaran dan pilihan bentuk pulangan yang dikemukakan pihak Kerajaan. Satu pelan pembangunan terperinci seterusnya akan disediakan dan dipamerkan kepada awam untuk mendapatkan pandangan sebelum pembangunan semula Kampong Bharu dilaksanakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN WONG HON WAI
[BUKIT BENDERA]**

TARIKH : 4 NOVEMBER 2019 (ISNIN)

SOALAN

Minta **PERDANA MENTERI** menyatakan kes-kes baru sejak Mei 2018 yang melibatkan pendakwaan Ahli Parlimen serta bekas Ahli Parlimen di Mahkamah serta seksyen dan Akta yang mereka didakwa.

**JAWAPAN: YB TUAN MOHAMED HANIPA BIN MAIDIN
TIMBALAN MENTERI DI JABATAN PERDANA
MENTERI**

Tuan Yang di-Pertua,

Sejak Mei 2018 seramai enam orang Ahli Parlimen telah didakwa di Mahkamah bagi kesalahan di bawah seksyen 165 dan 409 Kanun Keseksaan [Akta 574], subseksyen 4(1) Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 [Akta 613], dan seksyen 11, 16, 17, 23, 24 dan 28 Akta Suruhanjaya Pencegahan Rasuah Malaysia 2009 [Akta 694]. Walau bagaimanapun, sejak Mei 2018 tiada bekas Ahli Parlimen yang telah didakwa di Mahkamah.

Sekian, terima kasih.

**PEMBERITAHUAN PERTANYAAN DEWAN NEGARA
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SERI HAJI IDRIS BIN JUSOH
[BESUT]**

TARIKH : 4 NOVEMBER 2019

SOALAN NO. 34

Minta **MENTERI PENGANGKUTAN** menyatakan status terkini projek Rangkaian Kereta Api Pantai Timur (ECRL).

JAWAPAN

Yang di-Pertua

1. Untuk makluman Yang Berhormat, projek Laluan Rel Pantai Timur (ECRL) telah disambung semula setelah Perjanjian Tambahan diantara Malaysia Rail Link Sdn. Bhd. (MRL) dan China Communications Construction Company Ltd (CCCC) dimeterai pada 12 April 2019. Perjanjian yang ditambahbaik ini melibatkan kos projek yang lebih rendah iaitu sebanyak RM44 bilion berbanding kos asal projek sebanyak RM65.5 bilion.
2. Pengurangan kos sebanyak RM21.5 bilion ini telah berjaya dicapai melalui siri semakan semula aspek kejuruteraan dan kajian kejuruteraan nilai (value engineering) yang menyeluruh merangkumi semua aspek pelaksanaan projek. Hasil utama kajian ini ialah perubahan jajaran ECRL di antara Kota Bharu, Kelantan ke Dungun, Terengganu dan jajaran di antara Mentakab, Pahang ke Pelabuhan Klang, Selangor.
3. Jajaran baru ini berjaya mengurangkan kuantiti kerja-kerja rawatan tanah dan bilangan terowong dan laluan bertingkat yang perlu dibina sekaligus mengurangkan kos keseluruhan projek. Selain itu, jajaran baru dari Mentakab ke Pelabuhan Klang yang melalui daerah Jelevu di

Negeri Sembilan telah mengelakkan Permatang Kuarza Gombak yang dirancang untuk dinobatkan sebagai Tapak Warisan Dunia UNESCO daripada laluan ECRL. Di samping itu juga, stesen-stesen baharu telah dikenal pasti di Selangor dan Negeri Sembilan.

4. Keseluruhan kemajuan projek ECRL adalah pada 11.07 peratus bagi bulan September 2019 setelah mengambil kira kerja-kerja pra pembinaan yang merangkumi kerja-kerja reka bentuk dan perolehan. Di samping itu, kerja-kerja pembinaan bagi terowong dan laluan bertingkat di sepanjang 223km jajaran ECRL di antara Dungun, Terengganu dan Mentakab, Pahang juga sedang berjalan.

5. Bagi proses pengambilan tanah pula, pihak MRL telah menyambung semula proses pengambilan tanah bagi jajaran ECRL di antara Dungun, Terengganu dan Mentakab, Pahang di bawah Seksyen 8, Akta Pengambilan Tanah yang mana sebahagiannya telah diwartakan sebelum ini.

6. Selain itu, MRL sebagai pemilik projek ECRL telah mengemukakan Skim Keretapi ECRL pada bulan September 2019 bagi jajaran Kota Bharu ke Dungun kepada Agensi Pengangkutan Awam Darat (APAD). Ini selari dengan keperluan yang dinyatakan di dalam Akta Pengangkutan Awam Darat 2010 (Akta 715) untuk mendapatkan kelulusan bersyarat bagi menjalankan aktiviti Pemeriksaan Awam. Selain itu, penyediaan Laporan Penilaian Impak Alam Sekeliling (EIA), Laporan Penilaian Impak Warisan (HIA) dan Laporan Penilaian Impak Sosial (SIA) juga sedang dijalankan bagi mendapatkan kelulusan. Pemeriksaan awam akan dijalankan selama 3 bulan bagi orang ramai meneliti dan memberi maklumbalas terhadap jajaran baharu ECRL dari Kota Bharu, Kelantan ke Dungun, Terengganu.

7. Bagi jajaran Mentakab, Pahang ke Pelabuhan Klang, Selangor, pihak MRL sedang di dalam proses untuk menyerahkan Skim Keretapi untuk mendapatkan kelulusan bersyarat dari Agensi Pengangkutan Awam Darat (APAD). Laporan Penilaian Impak Alam Sekeliling (EIA), Laporan Penilaian Impak Warisan (HIA) dan Laporan Penilaian Impak Sosial (SIA) juga sedang disediakan untuk kelulusan bagi jajaran ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN CHOW KON YEOW [TANJONG]

TARIKH : 4 NOVEMBER 2019 (ISNIN)

SOALAN NO.35

Minta **MENTERI AIR, TANAH DAN SUMBER ASLI** menyatakan sama ada Hutan Simpan Ulu Muda telah diwartakan sepenuhnya. Jika tidak, nyatakan sebabnya dan bilakah Kerajaan Pusat akan berbuat demikian ekoran kepentingannya dalam pembekalan air kepada negeri-negeri utara Semenanjung khususnya.

JAWAPAN:

Tuan Yang di-Pertua,

Tanah dan hutan adalah di bawah bidang kuasa Kerajaan Negeri mengikut Perkara 74(2) Perlembagaan Persekutuan. Dalam hubungan ini, Kerajaan Negeri Kedah telahewartakan keseluruhan Hutan Simpan Ulu Muda yang terdiri daripada Hutan Simpan Ulu Muda Kedah Tengah dan Hutan Simpan Ulu Muda Kedah Selatan seluas 106,418 hektar sebagai Hutan Simpanan Kekal (HSK) di bawah Seksyen 7 Akta Perhutanan Negara 1984 [*Akta 313*] semenjak 24 September 1932.

Kawasan hutan yang telah diwartakan sebagai Hutan Simpanan Kekal ini selanjutnya telah dibuat pengelasan di bawah Seksyen 10(1), Akta 313 oleh Jabatan Perhutanan Negeri Kedah di mana seluas 16,299 hektar telah dikelaskan sebagai kawasan Hutan Tadahan Air dan 11,118 hektar lagi telah dikelaskan sebagai kawasan Hutan Taman Negeri. Dalam hubungan ini, saya ingin mengucapkan syabas dan tahniah kepada Kerajaan Negeri Kedah kerana telahewartakan pengelasan hutan tersebut pada tahun lalu melalui Warta Kerajaan Negeri Kedah Darul Aman No. 341 bertarikh 10 Mei 2018. Adalah diharapkan melalui pewartaan pengelasan ini, kawasan yang terbabit dapat dilindungi dan dipelihara daripada sebarang aktiviti yang dapat menjejaskan fungsi yang dimainkan oleh kawasan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI HAJI MUKHRIZ BIN TUN DR.
MAHATHIR [JERLUN]**

TARIKH : 4 NOVEMBER 2019 (ISNIN)

SOALAN NO.36

Minta **MENTERI AIR, TANAH DAN SUMBER ASLI** menyatakan apakah bentuk bantuan yang boleh disalurkan kepada Kerajaan Negeri sebagai pengganti kepada kehilangan hasil. Ini bagi menyahut saranan Kerajaan Persekutuan untuk memelihara alam semulajadi seperti hutan dari diusahakan melalui pembalakan, operasi kuari batuan dan sebagainya.

JAWAPAN:

Tuan Yang di-Pertua,

Kerajaan Persekutuan melalui Kementerian Kewangan telah memperuntukkan sejumlah RM60 juta pada tahun 2019 untuk pengagihan kepada negeri-negeri yang mengambil usaha melindungi kawasan perlindungan sedia ada dan menambah kawasan perlindungan yang baharu. Kesemua peruntukan RM60 juta tersebut telah disalurkan kepada Kerajaan-Kerajaan Negeri oleh Kementerian Kewangan selaras dengan keputusan Mesyuarat Majlis Kewangan Negara yang dipengerusikan oleh YAB Perdana Menteri pada 27 Mei 2019.

Pada masa ini, Kementerian Air, Tanah dan Sumber Asli sedang mengkaji instrumen *Ecological Fiscal Transfer For Biodiversity Conservation* (EFT) tersebut bersama dengan Kementerian Kewangan dan Kementerian Hal Ehwal Ekonomi bagi menggalakkan Kerajaan Negeri mempertingkatkan usaha bagi melindungi dan mewartakan kawasan Perlindungan.

Sekian, terima kasih.

PEMBERITAHUAN PERTANYAAN
BAGI JAWAPAN LISAN MESYUARAT KETIGA, PENGGAL KEDUA
PARLIMEN KEEMPAT BELAS DEWAN RAKYAT

PERTANYAAN : LISAN

DARIPADA : TUAN MA'MUN BIN SULAIMAN [KALABAKAN]

TARIKH : 4 NOVEMBER 2019 (ISNIN)

SOALAN

TUAN MA'MUN BIN SULAIMAN [KALABAKAN] minta **MENTERI INDUSTRI UTAMA** menyatakan apakah perancangan Kementerian dalam menyelesaikan kemelut dan permasalahan petani-petani pegangan kecil (*smallholding*) yang selama ini terlalu bergantung harap kepada tanaman kelapa sawit yang mengalami masalah harga yang kurang menguntungkan petani. Adakah usaha untuk memperkenalkan tanaman-tanaman lain yang boleh memberi pulangan lebih baik kepada petani dan dalam usaha mengurangkan kebergantungan terhadap pengimportan bahan-bahan makanan dari luar negara.

JAWAPAN

Untuk makluman Ahli-Ahli Yang Berhormat, Kementerian amat prihatin terhadap nasib pekebun kecil sawit yang amat bergantung pada hasil sawit yang telah terjejas akibat paras harga komoditi pada masa ini. Oleh yang demikian, bagi mengurangkan tahap kebergantungan sepenuhnya kepada hasil sawit, Kementerian amat mengalakkan para pekebun kecil melaksanakan integrasi tanaman. Kaedah ini jika diamalkan secara sistematik, disamping dapat memberi pendapatan tambahan kepada pekebun kecil sawit, ia juga akan dapat mengurangkan kebergantungan negara terhadap pengimportan bahan-bahan makanan dari luar negara.

Kementerian melalui Lembaga Minyak Sawit Malaysia (MPOB) telah melakukan pelbagai kajian ke atas pelbagai jenis tanaman yang dapat

menjana pendapatan kepada pekebun jika dilakukan secara integrasi dengan sawit. Sehingga kini teknologi integrasi tanaman melibatkan lebih daripada 20 jenis tanaman bernilai tinggi yang bersesuaian ditanam dengan sawit telah dipindahkan kepada pekebun kecil. Teknologi integrasi ini telah dikenalpasti dapat menjana pendapatan tambahan yang baik kepada penanam sawit di samping tidak menjejaskan aktiviti hasil utama buah tandan sawit.

Pekebun kecil sawit amat digalakkan untuk melaksanakan integrasi tanaman yang sesuai ketika sawit masih diperingkat umur muda kurang daripada tiga tahun. Pelbagai jenis tanaman jangka pendek sesuai untuk diintegrasikan di antara baris-baris sawit selepas program penanaman semula atau penanaman baru sawit siap dilaksanakan. Tanaman seperti pisang berangan, pisang tanduk, kacang tanah, nanas, tebu kuning, keledak, padi huma, tembikai, jagung manis, betik, sayur-sayuran dan lain-lain tanaman singkat sesuai ditanam di ruang yang kosong antara barisan sawit muda. Strategi memaksimumkan penggunaan tanah ini dapat menjana pendapatan awal yang lumayan kepada pekebun kecil jika dilaksanakan secara sistematik.

Bagi membolehkan integrasi tanaman dengan sawit dijalankan ketika sawit telah matang iaitu berumur lebih 3 tahun, MPOB telah membangunkan sistem tanaman sawit yang dikenali sistem tanaman sawit dua baris kembar. Sistem tanaman sawit dua baris kembar ini dapat meningkatkan penembusan cahaya matahari dan ruang untuk pelaksanaan integrasi tanaman dengan sawit. Menggunakan sistem ini, integrasi tanaman boleh dilaksanakan dalam jangka masa yang panjang dan tidak terhad ketika umur sawit masih muda.

Selain tanaman jangka pendek, tanaman jangka panjang juga sesuai diintegrasikan dalam sistem tanaman sawit dua baris kembar. Antara jenis tanaman yang telah dikaji sesuai untuk diintegrasikan dalam sistem tanaman sawit dua baris kembar ialah pisang berangan, pisang tanduk, kacang tanah, nanas, tebu kuning, keledak, tembikai, jagung manis, tongkat ali, lada hitam, salak dan lain-lain tanaman.

Sekian, Terima Kasih.